

欽定北史

卷之十
二五八

北史卷二十五

唐 李 延 壽 撰

列傳第十三

古弼 張黎 劉潔 丘堆 娥清

伊馘 乙瓌 周幾 豆代田 車伊洛

王洛兒 車路頭 盧魯元 陳建 來大千

宿石 萬安國 周觀 尉撥 陸真

呂洛拔 薛彪子子瓌 尉元

慕容白曜 和其奴 苟頽 宇文福

古弼代人也少忠謹善騎射初爲獵郎門下奏事以敏

正稱明元嘉其真而有用賜名曰筆後改名弼言其有
輔佐才也令典西部與劉潔等分綰機要敷奏百揆太
武卽位以功拜立節將軍賜爵靈壽侯歷位侍中吏部
尚書典南部奏事後征馮弘弘將奔高麗高麗救軍至
弘乃隨之令婦人被甲居中其精卒及高麗陳兵於外
弼部將高苟子擊賊軍弼酒醉拔刀止之故弘得東奔
太武大怒黜爲廣夏門卒尋復爲侍中與尚書李順使
涼州賜爵建興公鎮長安甚有威名及議征涼州弼與
順咸言涼州乏水草不宜行帝不從旣剋姑臧微嫌之
以其有將略弗之責宋將裴方明剋仇池立楊玄庶子

保熾於是假弼節督隴右諸軍討仇池平之未幾諸氏復推楊文德爲主圍仇池弼攻解其圍文德走漢川時東道將皮豹子聞仇池圍解議欲還軍弼使謂曰若其班師寇衆復至後舉爲難不出秋冬南寇必來以逸待勞百勝之策也豹子乃止太武聞之曰弼言長策也制有南秦弼謀多矣景穆總攝萬機徵爲東宮四輔與宜都王穆壽並參政事遷尚書令弼雖事務殷湊而讀書不輟端謹慎密口不言禁中事功名等於張黎而廉不及也上谷人上書言苑圃過度人無田業宜減太半以賜貧者弼入欲陳奏遇帝與給事中劉樹碁志不聽事

弼侍坐良久不獲申聞乃起於帝前摔樹頭掣下牀以手搏其耳以拳毆其背曰朝廷不理實爾之罪帝失色放碁曰不聽奏事過在朕樹何罪置之弼具狀以聞帝奇弼公直皆可其奏以與百姓弼曰爲臣逞志於君前者非無罪也乃詣公車免冠徒跣自劾請罪帝召之謂曰卿其冠履吾聞築社之役蹇蹙而築之端冕而事之神與之福然則卿有何罪自今以後苟利社稷益國便人者雖復顛沛造次卿則爲之無所顧也太武大閱將校獵於河西弼留守詔以肥馬給騎人弼命給弱者太武大怒曰尖頭奴敢裁量朕也朕還臺先斬此奴弼頭

尖帝常名之曰筆頭時人呼爲筆公屬官懼誅弼告之
曰吾謂事君使田獵不過盤游其罪小也不備不虞使
戎寇恣逸其罪大也今北狄孔熾南虜未滅狡焉之志
窺伺邊境是吾憂也故選肥馬備軍實爲不虞之遠慮
苟使國家有利吾寧避死乎明主可以理干此自吾罪
帝聞而歎曰有臣如此國之寶也賜衣一襲馬二疋鹿
十頭後車駕田於山北獲麋鹿數千頭詔尚書發車牛
五十乘運之帝尋謂從者曰筆公必不與我汝輩不如
馬運之速遂還行百餘里而弼表至曰今秋穀懸黃麻
菽布野豬鹿竊食烏鴈侵費風波所耗朝夕參倍乞賜

矜緩使得收載帝謂左右曰筆公果如朕卜可謂社稷之臣初楊難當之來也詔弼悉送其子弟於京師楊玄少子文德以黃金三十斤賂弼弼受金留文德而遇之無禮文德亡入宋太武以其正直有戰功弗加罪責太武崩吳王立以弼爲司徒文成卽位與張黎並坐議不合旨俱免有怨謗之言其家人告巫蠱俱伏法時人竄之

張黎鴈門平原人也善書計道武知待之明元器其忠亮賜爵廣平公管綜機要太武以其功舊任以輔弼除大司農卿軍國大議黎常與焉以征赫連定功進號征

北大將軍與樂安王範濟南公崔徽鎮長安清約公平
甚著聲稱代下之日家無餘財太武征涼州蠕蠕吳提
乘虛入寇黎與司空長孫道生拒擊走之景穆初總百
揆黎與崔浩等輔政忠於奉上非公事不言詔賜浩黎
布帛各千疋以褒舊勳吳王余立以黎爲太尉後文成
卽位與古弼俱誅

劉潔長樂信都人也昭成時慕容氏獻女潔祖父生爲
公主家臣乃隨入魏賜以妻妾生子堤位樂陵太守封
信都男卒潔襲堤爵數從征討進爵會稽公後與永安
侯魏勤及功勞將軍元屈等擊吐京叛胡爲其所執送

赫連屈丐潔聲氣不撓呼其字而與之言神色自若屈
丐壯而釋之後得還國典東部事明元寢疾太武監國
潔與古弼等選侍東宮對綜機要太武卽位奇其有柱
石用委以大任及議軍國朝臣咸推其能遷尚書令改
爲鉅鹿公車駕西伐潔爲前鋒沮渠牧犍弟董來距戰
於城南潔信卜者之言以日辰不協擊鼓却陣故董來
得入城太武微嫌之潔久在樞密恃寵自專帝心稍不
平時議伐蠕蠕潔言不如廣農積穀以待其來羣臣皆
從其議帝決行乃從崔浩議旣出與諸將期會鹿渾谷
而潔恨其計不用欲沮諸將乃矯詔更期諸將不至時

虜衆大亂景穆欲擊之潔執不可停鹿渾谷六日諸將
猶不集賊已遠遁追至石水不及而還師次漢中糧盡
士卒多死潔陰使人驚軍勸帝棄軍輕還帝不從潔以
軍行無功奏歸罪於崔浩帝曰諸將後期及賊不擊罪
在諸將豈在於浩又潔矯事遂發輿駕至五原收潔幽
之太武之征也潔私謂親人曰若軍出無功車駕不返
卽吾當立樂平王潔又使右丞張嵩求圖讖問劉氏應
王繼國家後我審有名姓不嵩對曰有姓而無名窮驗
款引搜嵩家果得讖書潔與南康公秋隣及嵩等皆夷
三族死者百餘人潔旣居勢要內外憚之側目而視籍

其家財產鉅萬太武追忿言則切齒

丘堆代人也美容儀初以忠謹入侍明元卽位拾遺左
右稍遷散騎常侍太武監國臨朝堆與太尉穆觀等爲
右弼及卽位賜爵臨淮公位太僕與宗正娥清略地關
右而宜城王奚斤表留堆合軍與赫連昌相拒斤進擊
赫連定留堆守輜重斤爲定禽堆聞而棄甲走長安帝
大怒遣西平公安頡斬堆

娥清代人也少有將略累著戰功稍遷給事黃門侍郎
明元南巡幸鄴以清爲中領軍將軍與宋兵將軍周幾
等度河略地至湖陸以功賜爵須昌侯與幾等遂鎮枋

頭太武初乃還京師進爲東平公後從平統萬遂與奚斤討赫連昌至安定及昌弟定西走斤追之清欲尋水往斤不從遂與斤俱爲定禽剋平涼乃得還後與古弼等東討馮弘以不急戰弘奔高麗檻車徵黜爲門卒而卒於家子延賜爵南平公

伊馱代人也少勇健走及奔馬善射力曳牛却行神麈初擢爲侍郎轉三郎賜爵汾陽子太武將討涼州議者咸以無水草諫唯司徒崔浩勸行羣臣出後馱曰涼州若無水草何得爲國宜從浩言帝善之及剋涼州大會於姑臧帝謂羣臣曰崔公智計有餘吾亦不復奇之正

奇馘弓馬士所見能與崔同耳顧謂浩曰馘智力如此終至公相浩曰何必讀書然後爲學衛青霍去病亦不讀書而致公輔帝欲以馘爲尚書封郡公馘以尚書務殷公爵至重辭之中祕二省多諸文士請參其次帝賢之遂拜祕書監賜爵河南公拜司空清約自守爲政舉大綱而已不爲苛碎大安二年領太子太保三年與司徒陸麗等並平尚書事薨子蘭襲爵位庫部尚書卒子益生驍勇有膽氣累有戰功遂爲名將以勳賜爵平城子爲西道都督歿贈雍州刺史

乙瓌代人也其先世統部落太武時瓌父匹知遣瓌入

貢帝留之瓌善騎射手格猛獸尚太武女上谷公主除
駙馬都尉賜爵西平公從駕南征都督前鋒諸軍事勇
冠三軍後進爵爲王又爲西道都將薨年二十九贈太
尉公諡曰恭子乾歸襲爵乾歸有氣幹頗習書疏尤好
兵法尚景穆女安樂公主除駙馬都尉侍中獻文初爲
秦州刺史有惠政孝文卽位爲中道都將卒諡曰康子
海字懷仁位散騎侍郎卒諡曰孝海子瑗字雅珍尚孝
文女淮陽公主除駙馬都尉累遷西兗州刺史天平元
年舉兵應樊子鵠戰敗死

周幾代人也少以善射爲獵郎明元卽位爲左部尚書

以軍功封交趾侯太武以幾有智勇遣鎮河南威信著于外境幾常嫌奚斤等綏撫關中失和每至言論形于聲色斤等憚焉進號宋兵將軍率洛州刺史于栗磾以萬人襲陝城卒于軍軍人無不歎惜之歸葬京師諡曰桓子步襲爵

豆代田代人也明元時以善騎射爲內細射從攻武牢詔代田登樓射賊矢不虛發以功遷內三郎從射赫連昌乘勝追賊入其宮門門閉代田踰宮而出太武壯之拜勇武將軍後從討平涼破赫連定得奚斤等以定妻賜之詔斤膝行授酒於代田敕斤曰全爾身命者代田

功也以從討和龍戰功封長廣公卒於統萬鎮大將贈長廣王諡曰恭子周求襲爵

車伊洛焉耆胡也世爲東境部落帥恒脩職貢延和中授平西將軍封前部王伊洛規欲歸闕爲沮渠無諱斷路伊洛連戰破之無諱卒伊洛前後遣使招喻其子乾壽等及其戶五百餘家送之京師又率部衆二千餘人伐高昌討破焉耆東關七城正平二年伊洛朝京師拜都官尚書將軍王如故卒諡康王葬禮依盧魯元故事子歇襲爵

王洛兒京兆人也明元在東宮以善騎射給事帳下謹

愿未嘗有過明元嘗獵于灑南水陷沒馬洛兒投水奉
帝出殆將凍死帝解衣賜之自是恩寵日隆天賜末帝
避難居外洛兒晨夜侍衛恭勤發於至誠元紹之逆帝
左右唯洛兒與車路頭晝居山嶺夜還洛兒家洛兒隣
人李道潛相奉給晨復還山衆庶頗知喜而相告紹聞
收道斬之洛兒猶冒難往返京都通問於大臣大臣遂
出奉迎百姓奔赴明元還宮社稷獲全洛兒有功焉明
元卽位拜散騎常侍賜爵新息公加直意將軍又追贈
其父爲列侯賜僮隸五十戶卒贈太尉建平王賜溫明
祕器載以輜輶車使殿中衛士爲之導從親臨哀慟者

四焉乃鳩其妻周氏與合葬子長城襲爵

車路頭代人也少以忠厚選給東宮爲帳下帥天賜末
明元出於外路頭隨侍竭力及卽位封宣城公忠意將
軍帝性明察羣臣多以職事遇譴至有杖罰故路頭優
游不任事性無害每評獄處理常獻寬恕之議以此見
重於朝帝亦敬納之卒明元親臨哀慟贈太保宣城王
諡曰忠貞喪禮一依安城王叔孫俊故事陪葬金陵子
脊襲爵

盧魯元昌黎徒河人也曾祖副鳩仕慕容氏爲尚書令
臨澤公祖父並至大官魯元寬和有雅度明元時選爲

通直郎以忠謹給侍東宮太武親愛之卽位以爲中書
侍郎寵待彌渥而魯元益加謹肅帝愈親待之內外大
臣莫不敬憚性多容納善與人交好掩人過揚人美由
是公卿咸親附之以工書有文才累遷中書監領祕書
事賜爵襄城公贈其父爲信都侯從征赫連昌太武親
追擊入其城門魯元隨帝出入是日微魯元幾至危殆
後遷太保錄尚書事帝貴異之臨幸其第不出旬日欲
其居近易往來乃賜甲第於宮門南衣食車馬皆乘輿
之副真君三年駕幸陰山魯元以疾不從侍臣問疾醫
藥傳驛相屬於路及薨帝甚悼惜之還臨其喪哭之哀

慟東西二宮命大官日送奠晨昏哭臨訖則備奏鍾鼓伎樂輿駕比葬三臨之喪禮依安城王叔孫俊故事而贈送有加贈襄城王諡曰孝葬於崞山爲建碑闕自魏興貴臣恩寵無與爲比子統襲爵以父任侍東宮太武以元舅陽平王杜超女南安長公主所生妻之車駕親自臨送太官設供具賞賚千計文成卽位典選部主客二曹卒贈襄城王諡曰景無子弟彌娥襲卒贈襄城王諡曰恭魯元少子內給侍東宮景穆深昵之常與臥起同衣食父子有寵兩宮勢傾天下內性寬厚有父風而恭慎不及正平初宮臣伏誅太武以魯元故唯殺內而

厚撫其兄弟

陳建代人也以善騎射擢爲三郎遷下大夫內行長太武討山胡白龍輕之單將騎數十每自登山白龍伏壯士出不意帝墜馬幾至不測建以身捍賊奮擊殺數人被十餘瘡帝壯之賜別戶二十文成初出爲幽州刺史假秦郡公帝以建貪暴懦弱遣使就州罰杖五十孝文初徵爲尚書右僕射加侍中進爵趙郡公建與晉陽侯元祉德長樂王穆亮平原王陸叡密表啓南伐帝嘉之遷司徒進爵魏郡王帝與文明太后頻幸建第賜建妻宴於後庭薨子念生襲有罪爵除

來大千代人也父初真從道武避難叱候山參勅業功
官至後將軍武原侯與在八議大千驍果善騎射永興
初襲爵位中散至於朝賀之日大千常著御鎧盤馬殿
庭朝臣莫不嗟嘆遷內三郎幢將典宿衛禁旅大千用
法嚴明上下齊肅嘗從明元校獵見獸在高巖上持稍
直前刺之應手而死帝嘉其勇壯太武踐阼與襄城公
盧魯元等七人俱爲常侍常持仗侍衛晝夜不離左右
累從征伐以戰功賜爵廬陵公鎮雲中兼統白道軍事
太武以其壯勇數有戰功兼悉北境險要詔使巡撫六
鎮以防寇虜經略布置甚得事宜後吐京胡反以大千

爲都將討平之在吐京卒喪還停於平城南太武出游還見而問之左右以對帝悼歎者良久詔聽其喪入殯城內贈司空謚莊公子丘頽襲爵降爲晉興侯

宿石朔方人赫連屈丐弟文陳之曾孫也天興中文陳父子歸魏道武嘉之以宗女妻焉拜上將軍祖若豆根明元時賜姓宿氏襲上將軍父沓干從大武征平涼有功賜爵漢安男後從討蠕蠕戰沒石年十三襲爵擢爲中散遷內行令從於苑中游獵石走馬引前道峻馬倒殞絕久之乃蘇由是御馬得制文成嘉之賜以綿帛駿馬改爵義陽子又常從獵文成親欲射猛獸石叩馬諫

引帝至高原上後猛獸騰躍殺人褒美其忠許後有犯
罪宥而勿坐賜駿馬一疋尚上谷公主拜駙馬都尉位
吏部尚書進爵太山公爲北征中道都大將卒追贈太
原王諡康葬禮依盧魯元故事太和初子倪襲爵

萬安國代人也世爲酋帥父振尚高陽長公主拜駙馬
都尉位長安鎮將爵馮翊公安國少明敏以國甥復尚
河南公主拜駙馬都尉獻文特親寵之與同臥起拜大
司馬大將軍封安城王安國先與神部長奚買奴不平
承明初矯詔殺買奴於苑中孝文聞之大怒遂賜死年
二十三子翼襲王爵有嵇根者世爲紇奚部帥皇始初

北史卷二十一 列傳

率部歸魏尚昭成女生子拔位尚書令拔尚華陰公主生子敬元紹之逆也主有功超授敬大司馬封長樂王薨子護襲拜外都大官根事迹遺落故略附云
周觀代人也驍勇有膂力太武以軍功賜爵金城公位高平鎮將善撫士卒號有威名後拜內都大官出爲秦州刺史撫馭失和部人薛永宗聚衆汾曲以叛觀討永宗爲流矢所中太武幸蒲坂觀聞帝至驚怖而起瘡重遂卒帝怒絕其爵云

尉撥代人也父邠濮陽太守撥爲太學生募從兗州刺史羅忸擊賊於陳汝有功賜爵介休男討和龍擊吐谷

渾皆有軍功進爵爲子累遷杏城鎮將大得人和文成以撥清平有惠績賜以衣服獻文卽位爲北征都將南攻懸瓠進爵安城侯位北豫州刺史卒謚敬侯

陸真代人也父洛侯秦州刺史真少善騎射太武以真膂力過人拜內三郎真君中從討蠕蠕以功賜爵關內侯後攻懸瓠登樓臨射城中弦不虛發從太武至江還次盱眙真功居多文成卽位進爵都昌侯位選部尚書後拜長安鎮將時初置長蛇鎮真率衆築城未訖而氏豪仇偁檀等反叛真擊平之卒城長蛇而還東平王道符反于長安以真爲長安鎮將賜爵河南公長安平兵

人素伏其威信及至皆怙然安靜在鎮數年甚著威稱
卒諡曰烈子延字契胡提頗有氣幹襲爵河南公例降
改封汝陽侯位懷朔鎮大將太僕卿受使綏慰秀容爲
牧子所害

呂洛拔代人也曾祖渴侯昭成時率戶五千歸魏父匹
知太武時爲西部長封滎陽公洛拔以壯勇知名文成
末爲平原鎮都將隨尉元攻宋將張永大敗之賜爵成
武侯卒長子文祖獻文以其勳臣子補龍牧曹奏事中
散以牧產不滋坐徙武川鎮後文祖以舊語譯註皇誥
辭義通辯爲外都曹奏事中散後坐事伏法

薛彪子代人也祖達頭自姚萇時率部落歸魏道武賜爵聊城侯待以上客禮賜妻鄭氏卒贈冀州刺史諡曰悼父野賭并太二州刺史封河東公有聲稱卒諡曰簡彪子姿貌壯偉明斷有父風爲內行長典奏諸曹事當官正直內外憚之及文明太后臨朝出爲枋頭鎮將素剛簡爲近臣所嫉因小過黜爲鎮門士及獻文南巡次山陽彪子拜訴於路復除枋頭鎮將累遷開府徐州刺史在州甚多惠政百姓便之沛郡太守邵安下邵太守張攀咸以贓汙彪子案之於法安等遣子弟上書誣彪子南通賊虜孝文曰此妄矣推案果虛卒諡曰文子琬

瑛字曇珍形貌瓌偉少以幹用爲典客令每引見儀望甚美宣武謂曰卿風度峻整姿貌秀異後當升進何以處官瑛答曰宗廟之禮不敢不敬朝廷之事不敢不忠自此之外非庸臣所及正光中行洛陽令部內肅然時以久旱京師見囚悉召集於都亭理問寃滯洛陽獄唯有三人孝明嘉之賜縑百疋瑛本附元義義廢憂懼由是政教廢弛坐免官李神軌有寵於靈太后瑛復事之累遷吏部郎中先是吏部尚書崔亮奏立停年格不簡人才專問勞舊瑛乃上書曰臣聞錦穀雖輕不委之以學割瑚璉任重豈寄之以弱力若使選曹唯取年勞不

簡賢否使義均行鴈次若貫魚勘簿呼名一吏足矣數人而用何爲銓衡今黎元之命繫於守長若其得人則蘇息有地任非其器爲患更深請郡縣之職吏部先盡擇才并學通古今曉達政職者以應其選不拘入職遠近年勲多少其積勞之中有才堪牧人者自在先用之限其餘不堪者旣壯藉其力豈容老而棄之將佐丞尉去人稍遠小小當否未爲多失宜依次補敘以酬其勞書奏不報後因引見復陳之曰今四方初定務在養人臣請依漢氏更立四科令三公宰貴各薦時賢以補郡縣明立條格防其阿黨之端庶令塗炭之餘戴仰有地

詔下公卿議之事亦寢元天穆討邢杲以瑒爲行臺尚書軍次東郡時元顥已據鄆城邢杲又逼歷下天穆議其所先議者咸以杲盛宜先經略唯瑒以杲爲聚衆無名雖強猶賊元顥皇室昵親來稱義舉自河陰之役人情駭怨今有際會易生感動待顥事決然後迴師天穆以羣情所願遂先討杲杲降軍還至定陶天穆留瑒行西兗州事尋爲元顥所陷顥執瑒自隨亦朱榮破顥天穆謂瑒曰不用君言乃至於此天平初拜七兵尚書齊神武引爲丞相府長史軍國之事多所關知瑒亦推誠盡節屢進忠讜神武大舉西伐將度蒲津瑒諫曰西賊

連年饑饉故冒死來入陝州但宜置兵諸道勿與野戰
比及來年麥秋人應餓死寶炬黑獺自然歸降願無渡
河侯景亦曰今舉兵極大萬不一捷卒難收斂不如分
爲二軍相繼而進前軍若勝後軍合力前軍若敗後軍
承之神武皆弗納遂有沙苑之敗後范陽盧仲禮反瑒
與諸軍討平之轉殷州刺史爲政嚴酷吏人苦之後歷
位度支殿中二尚書天保元年卒於兼尚書右僕射臨
終敕其子斂以時服踰月便葬不聽干求贈官自制喪
車不加彫飾但用麻爲旒蘇繩綱絡而已明器等物並
不令置瑒久在省闈明閑簿領當官剖斷敏速如流然

天性險忌情義不篤外若方格內實浮動受納貨賄曲
理舞法深文刻薄多所傷害人士畏惡之魏東平王元
匡妾張氏淫逸放恣取初與姦通後納以爲婦惑其讒
言遂棄前妻于氏不認其子允家人內忿競相告列深
爲世所譏鄙贈開府儀同三司尚書左僕射青州刺史
諡曰威恭子允嗣

尉元字苟仁代人也世爲豪宗父目斤勇略聞於當時
位中山太守元以善射稱爲羽林中郎以匪懈見知稍
遷駕部給事中賜爵富城男和平中遷北部尚書進爵
大昌侯天安元年薛安都以徐州內附獻文以元爲持

節都督東道諸軍事與城陽公孔伯恭赴之宋兗州刺史畢衆敬遣東平太守章仇榭歸款元並納之遂長驅而進宋遣將張永沈攸之等屯于下礮安都出城見元元依朝旨授其徐州刺史遣中書侍郎高閭李璨等與安都俱還入城別令孔伯恭撫安內外然後元入彭城元以永仍據險要乃命安都與璨等同守身率精銳揚兵於外分擊呂梁絕其糧道永遂捐城夜遁於是遣高閭與張讜對爲東徐州刺史李璨與畢衆敬對爲東兗州刺史拜元開府都督徐州刺史淮陽公太和初徵爲內都大官旣而出爲使持節鎮西大將軍開府統萬鎮

都將甚得夷人之心三年進爵淮陽王以舊老見禮聽
乘步挽杖於朝齊高帝既立多遣間諜扇動新人不逞
之徒所在蜂起以元威名夙振使總率諸軍以討之東
南清晏遠近帖然入爲侍中都曹尚書遷尚書令進位
司徒十年例降庶姓王爵封山陽郡公其年頻表以老
乞身詔許之元詣闕謝老引見於庭命升殿勞宴賜立
冠素服又詔曰前司徒山陽郡公尉元前大鴻臚卿新
太伯游明根並元亨利貞明允誠素位顯台宿歸老私
第可謂知始知卒希世之賢也公以八十之年宜處三
老之重卿以七十之齡可充五更之選於是養三老五

更於明堂國老庶老於階下孝文再拜三老親袒割牲
執爵而饋於五更行肅拜之禮賜國老庶老衣服有差
既而元言曰自天地分判五行施則人之所崇莫重於
孝順然五孝六順天下之所先願陛下重之以化四方
臣既年衰不究遠趣心耳所及敢不盡誠帝曰孝順之
道天地之經今承三老明言銘之于懷明根言曰夫至
孝通靈至順感幽故詩云孝悌之至通於神明光于四
海如此則孝順之道無所不格願陛下念之以濟黎庶
臣年志朽弊識見昧然在於愚慮不敢不盡帝曰五更
助三老以言至範敷展德音當克已復禮以行來授禮

畢乃賜步挽一乘詔曰夫尊老尚更列聖同致欽年敬德綿哲齊軌朕雖道謝玄風識昧叡則然仰稟先誨企遵猷旨故推老以德立更以元父焉斯彰兄焉斯顯矣前司徒公元前鴻臚卿明根並以冲德懸車懿量歸老故尊老以三事更以五雖老更非官耄耄罔祿然況事既高宜加殊養三老可給上公祿五更可食元卿俸供食之味亦同其例十七年元疾篤帝親省疾薨諡景桓公葬以殊禮給羽葆鼓吹假黃鉞班劍四十人子翊襲爵遷洛以山陽在畿內改爲博陵郡公卒於恒州刺史諡曰順

慕容白曜慕容晃之玄孫也父瑊歷官以廉清著稱賜
爵高都侯終尚書左丞諡曰簡白曜少爲中書吏以敦
直給事宮中襲爵稍遷北部尚書文成崩與乙渾共執
朝政遷尚書右僕射進爵南鄉公宋徐州刺史薛安都
兗州刺史畢衆敬並以城內附詔鎮南大將軍尉元鎮
東將軍孔伯恭赴之而宋東平太守申纂屯無鹽并州
刺史房崇吉屯斗城遏絕王使皇興初加白曜使持節
督諸軍事征南大將軍進爵上黨公屯碣磳爲諸軍後
繼白曜攻纂於無鹽拔其東郭纂遁遣兵追執之廻攻
斗城肥城戍主聞軍至棄城遁走獲粟三十萬石又下

襲破麋溝垣苗二戍得粟十餘萬斛由是軍糧充足先是淮陽公皮豹子再征垣苗不剋白曜一旬內頻拔四城威震齊土獻文下詔褒美之斗城不降白曜縱兵陵城殺數百人崇吉夜遁白曜撫其人百姓懷之獲崇吉母妻待之以禮宋遣將吳喜公欲寇彭城鎮南大將軍尉元請濟師獻文詔白曜赴之白曜到瑕丘遇患因停會崇吉與從弟法壽盜宋盤陽城以贖母妻白曜遣將軍長孫觀等率騎入自馬耳關赴之觀至盤陽諸縣悉降白曜自瑕丘進攻歷城二年崔道固及兗州刺史梁鄒守將劉休賓並面縛而降白曜皆釋之遂遣固休賓

及其寮屬于京師後乃徙二城人望於下館朝廷置平
齊郡懷寧歸安二縣以居之自餘悉爲奴婢分賜百官
白曜雖在軍旅而接待人物寬和有禮所獲崇吉母妻
申纂婦女皆別營安置不令士卒喧雜及進克東陽擒
沈文秀凡獲倉粟八十五萬斛始末三年築圍攻擊雖
士卒死傷無多怨叛三齊欣然安堵樂業剋城之日以
沈文秀抗倨不爲之拜忿而搗撻唯以此見譏以功拜
開府儀同三司都督青州刺史進爵濟南王初乙渾專
權白曜頗所挾附後緣此追以爲責四年見誅云謀反
叛時論寃之白曜少子真安年十一聞父被執將自殺

家人止之曰輕重未可知真安曰王位高功重若小罪終不至此我不忍見父之死遂自縊太和中著作佐郎成淹上表理白曜孝文覽表嘉愍之白曜弟子契輕薄無檢太和初以名家子擢爲中散遷宰官中散南安王楨有貪暴之響遣中散閻文祖詣長安察之文祖受楨金寶之賂爲楨隱而不言事發太后引見羣臣謂曰前論貪清皆云剋脩文祖時亦在中後竟犯法以此言之人心信不可知孝文曰卿等自審不勝貪心者聽辭位歸第契進曰小人之心無定而帝王之法有常以無恒之心奉有常之法非所剋堪乞垂退免帝曰契若知心

不可常卽知貪之惡矣何爲求退遷宰官令賜爵定陶男後卒於都督朔州刺史諡曰剋初慕容氏破後種族仍繁天賜末頗忌而誅之時有免者不敢復姓皆以輿爲氏延昌末詔復舊姓而其子女先入掖庭者猶號慕容特多於他族

和其奴代人也少有操行善射御初爲三郎文成初封平昌公累遷尚書左僕射又與河東王閭毗太宰常英等並平尚書事在官慎法不受私請遷司空加侍中文成崩乙渾與林金閭擅殺尚書楊保年等時殿中尚書元郁率殿中宿衛士欲加兵於渾渾懼歸咎於金閭執

以付郁時其奴以金閭罪惡未分出之爲定州刺史皇
興元年長安鎮將東平王道符反詔其奴討之未至而
道符敗軍還薨內外歎惜之贈平昌王諡曰宣子受襲
爵

苟頽代人也本姓若干父洛拔內行長頽厚重寡言少
嚴毅清直武力過人擢爲中散小心謹敬太武至江賜
爵建德男累遷司衛監洛州刺史抑強扶弱山蠻畏威
不敢爲寇太和中歷位侍中都曹尚書進爵河南公頽
方正好直言雖文明太后生殺不允頽亦言至懇切李
惠李新之誅頽並致諫遷司空進爵河東王以舊老聽

乘步挽杖於朝大駕行幸三川顏留守京師沙門法秀
謀反顏率禁旅收掩畢獲內外晏然薨諡僖王長子愷
襲爵河東王例降爲公

宇文福其先南單于之遠屬也世爲擁部大人祖活撥
仕慕容垂爲唐郡內史遼東公道武之平慕容氏活撥
入魏爲第一客福少驍果有膂力太和初累遷都牧給
事及遷洛敕福檢牧馬所福規石濟以西河內以東拒
黃河南北千里爲牧地今之馬場是也及徙代移雜畜
牧於其所福善於將養並無損耗孝文嘉之尋補司衛
監後以勲封襄樂縣男歷位太僕卿都官尚書營州太

中正瀛州刺史性忠清在公嚴毅以信御人甚得聲譽
後除都督懷朔沃野武川三鎮諸軍事懷朔鎮將至鎮
卒諡曰貞惠子延字慶壽體貌魁岸眉目疎朗位員外
散騎侍郎以父老詔聽隨侍在瀛州屬大乘祆黨突入
州城延率奴客逆戰身被重瘡賊縱火燒齋閣福時在
內延突火入抱福出外支體灼爛鬢髮盡焦於是勒衆
與賊苦戰賊乃散走以此見稱累遷直寢與万俟醜奴
戰沒

論曰古弼軍謀經國有柱石之量張黎誠謹廉方以勲
舊見重並織介之間一朝隕覆脊及十世乃徒言耳劉

潔咎之徒也丘堆敗以亡身娥清伊馘俱以材力見用而馘以謀猷取異其殆優乎乙瓌之驍猛周幾之智勇代田之騎射其位遇豈徒然也車伊洛宅心自遠豈常戎乎王洛兒車路頭盧魯元陳建來大千宿石或誠發于衷竭節危難或忠存衛主義足感人苟非志烈亦何能若此宜其生受恩遇歿盡哀榮至如安國以至覆亡害盈之義也周觀尉撥陸真呂洛拔等咸以勇毅自進而觀竟致貶黜異夫數子者矣薛彪子世載強正曇珍克盛家聲美矣乎魏之諸將罕方面之績尉元以寬雅之風膺將帥之任威名遠被位極公老自致乞言之地

無乃近代之一人歟白曜出專薄伐席卷三齊考績圖
勞固不細矣而功名難處追猜嬰戮宥賢議勤未聞於
斯日也和其奴之貞正苟顏之剛直宇文福之氣幹咸
亦有用之士乎

北史卷二十五考證

古弼傳吾謂事君使田獵不過盤遊其罪小也○過魏書作適

劉潔傳潔與南康公秋隣及嵩等皆夷三族○秋字誤魏書作狄字應從之

豆代田傳子周求襲爵○周求魏書作求周

陳建傳賜建妻宴於後庭○監本脫宴字今從魏書增正

來大千傳至於朝賀之日○日監本訛曰今改從魏書陸真傳從太武至江還次盱眙真功居多○次魏書作

攻應從之

薛琬傳遂棄前妻子氏不認其子允○監本缺認字今從閣本增入

慕容白曜傳以名家子擢爲中散遷宰官中散○魏書宰官下無中散二字

皆以輿爲氏○輿監本訛輿今從魏書改正

北史卷二十五考證

北史卷二十六

唐 李 延 壽 撰

列傳第十四

宋隱

從子情 情孫弁 弁孫欽道 弁族弟翻 弟子世良

世軌

翻弟世景

弁族弟翻

許彥

五世孫惇

刁廡

子遵

曾孫沖

辛紹先

韋閩

孫子粲

杜銓

宋隱字處默西河介休人也曾祖奭祖活父恭世仕慕容氏位並通顯慕容儁徙鄴恭始家於廣平列人焉隱性至孝專精好學仕慕容垂位本州別駕道武平中山

拜隱尚書吏部郎積遷行臺右丞領選以老病乞骸骨
不許尋以母喪歸列人既葬被徵乃棄妻子匿於長樂
數年而卒臨終謂其子經曰汝等苟能入順父兄出悌
鄉黨仕郡幸而至功曹史以忠清奉之足矣不勞遠詣
臺閣恐汝不能富貴徒延門戶累耳若忘吾言是死若
父也使鬼有知吾不歸食矣隱弟宣字道茂與范陽盧
玄勃海高允博陵崔建從子愔俱被徵拜中書博士後
拜侍郎行司徒校尉卒諡曰簡侯宣子謨字乾仁襲爵
卒於遼西太守子鸞襲爵位東莞太守鸞弟瓊字普賢
以孝稱母曾病季秋月思瓜瓊夢想見之求而遂獲時

人異之卒於家愔歷中書博士員外散騎常侍使江南
爵列人子卒於廣平太守長子顯襲爵顯無子養弟子
弁爲後

弁字義和父叔珍娶趙郡李敷妹因敷事而死弁至京
師見尚書李冲因言論移日冲異之退曰此人一日千
里王佐才也顯卒弁襲爵弁與李彪州里迭相祇好彪
爲秘書丞請爲著作佐郎遷尚書殿中郎中孝文曾因
朝會次歷訪政道弁年少官微自下而對聲姿清亮進
止可觀帝稱善者久之因是大被知遇賜名爲弁意取
弁和獻玉楚王不知寶之也遷中書侍郎兼員外散騎

常侍使齊齊司徒蕭子良秘書丞王融等皆稱美之以爲志氣謇諤不逮李彪而體韻和雅舉止閑邃過之轉散騎侍郎時散騎位在中書之右孝文曾論江左事問弁在南興亡之數弁以爲蕭氏父子無大功於天下旣以逆取不能順守必不能貽厥孫謀保有南海若物憚其威身免爲幸後車駕南征以弁爲司徒司馬東道副將軍人有盜馬鞞者斬而徇於是三軍震懼莫敢犯法黃門郎崔光薦弁自代帝不許亦賞光知人未幾以弁兼司徒左長史時大選內外羣官并定四海士族弁專參銓量之任事多稱旨然好言人之陰短高門大族意

所不便者弁因毀之至於舊族淪滯而人非可忌者又
申達之弁又爲本州大中正世族多所降抑頗爲時人
所怨遷散騎常侍尋遷右衛將軍領黃門弁屢自陳讓
帝曰吾爲相知者卿亦不可有辭豈得專守一官不助
朕爲政且常侍者黃門之麤冗領軍者三衛之假攝不
足空存推讓以棄大委其被知遇如此孝文北都之選
李沖多所參預頗抑宋氏弁恨沖而與李彪交結雅相
知重及彪之抗沖沖謂彪曰爾如狗耳爲人所嗾及沖
劾彪不至大罪弁之力也彪除名弁大相嗟慨密圖申
復孝文在汝南不豫大漸旬餘日不見侍臣左右唯彭

城王勰等數人而已小瘳乃引見門下及宗室長幼諸人入者未能皆致悲泣惟弁與司徒司馬張海歔歔流涕由是益重之車駕征馬圈留弁以本官兼祠部尚書攝七兵事及行執其手曰國之大事在祀與戎故令卿縮攝二曹弁頓首辭謝弁劬勞王事恩遇亞於李冲帝每稱弁可爲吏部尚書及崩遺詔以弁爲之與咸陽王禧等六人輔政而弁先卒年三十八贈瀛州刺史諡曰貞順弁性好矜伐自許膏腴孝文以郭祚晉魏名門從容謂弁曰卿固當推郭祚之門弁笑曰臣家未肯推祚帝曰卿自漢魏以來旣無高官又無雋秀何得不推弁

曰臣清素自立要爾不推侍臣出後帝謂彭城王勰曰
弃人身自不惡乃復欲以門戶自矜殊爲可怪長子維
字伯緒襲父爵爲給事中坐諂事高肇出爲益州龍驤
府長史辭疾不行太尉清河王懌輔政以維名臣子薦
爲通直郎辟其弟紀行參軍靈太后臨政委任元又恃
寵僑盈懌每以公理裁斷又甚忿恨思害懌遂與維作
計以富貴許之維見又寵勢日隆乃告司染都尉韓文
殊父子謀逆立懌懌被錄禁中文殊父子懼而逃遁鞠
無反狀以文殊亡走懸處大辟置懌於宮西別館禁兵
守之維應反坐又言於太后欲開將來告者之路乃黜

爲燕州昌平郡守紀爲秦州大羌令維及紀頗涉經史而浮薄無行懌尊親懿望朝野瞻屬維受懌眷賞而無狀構間天下士人莫不怪忿而賤薄之及又殺懌專斷朝政以維兄弟前者告懌徵維爲散騎侍郎紀爲太學博士領侍御史又甚昵之維超遷通直常侍又除洛州刺史紀超遷尚書郎紀字仲烈初并謂族弟世景言維疎險而紀識慧不足終必敗吾業世景以爲不爾至是果然聞者以爲知子莫若父尚書令李崇左僕射郭祚右僕射游肇每云伯緒凶疎終敗宋氏幸得殺身耳論者以爲有徵後除營州刺史靈太后反政以又黨除名

遂還鄉里尋追其前誣告清河王事於鄴賜死子春卿
早亡弟紀以次子欽仁嗣欽仁武定末爲太尉祭酒紀
明帝末爲北道行臺卒晉陽子欽道

欽道仕齊歷位中山太守長於撫接然好察細事其州
府佐吏使人間者先酬錢然後敢食臨莅處稱爲嚴整
尋徵爲黃門侍郎又令在東宮教太子吏事時鄭子默
以文學見知亦被親寵欽道本文法吏不甚諳識古今
凡有疑事必詢子默二人幸於兩宮雖諸王貴臣莫敢
不敬憚欽道又遷秘書監仍帶黃門侍郎乾明初遷侍
中與楊愔同誅贈吏部尚書趙州刺史弁族弟穎字文

賢位魏郡太守納貨劉騰騰言之以爲涼州刺史穎前妻劉氏亡後十五年穎夢見之拜曰新婦今被處分爲高崇妻故來辭君泣然涕流穎旦見崇言之崇後數日而卒穎族弟鴻貴爲定州北平府參軍送戍兵於荊州坐取兵絹四百匹兵欲告之乃斬兵十人又疏凡不達見令律有梟首罪乃生斷兵手以水澆之然後斬決尋坐伏法時人哀兵之苦笑鴻貴之愚弁族弟翻

翻字飛鳥少有操行世人以剛斷許之孝莊時除司徒左長史河南尹初翻爲河陰令順陽公主家奴爲劫攝而不送翻將兵圍主宅執主壻馮穆步驅向縣時正炎

暑立之日中流汗霑地縣舊有大柳時人號曰彌尾青
及翻爲縣主吏請焚之翻曰置南墻下以待豪右未幾
有內監楊小駒詣縣請事辭色不遜翻命取尾青以鎖
之小駒旣免入訴於宣武宣武大怒敕河南尹推之翻
具自陳狀詔曰卿故違朝法豈不欲作威以買名翻對
曰造者非臣買名者亦宜非臣所以留者非敢施於百
姓欲待凶暴之徒如駒者耳於是威振京師及爲洛陽
迄於河南尹畏憚權勢更相承接故當世之名大致減
損卒官贈侍中衛將軍相州刺史孝武初重贈驃騎大
將軍儀同三司尚書左僕射雍州刺史諡曰貞烈翻弟

毓字道和敦篤有志行卒於大中大夫子世良

世良字元友年十五便有膽氣後隨伯父翻在南兗州
屢有戰功行臺臨淮王彧與語奇之魏朝以彧朱榮有
不臣跡帝將圖之密令彧將兵赴洛彧在梁郡稱疾假
世良都督令還南兗發兵以聽期世良請簡見兵三千
騎五日必到洛陽并陳三策彧皆不能從尋爲殿中侍
御史詣河北括戶大獲浮惰還見汲郡城旁多骸骨移
書州郡悉令收瘞其夜甘雨滂沱河內太守田估贓貨
百萬世良檢按之未竟遇赦而還孝莊勞之曰知卿所
括得丁倍於本帳若官人皆如此用心便是更出一天

下也其後遷殿中世良奏殿中主齊會之事請改付餘
曹帝曰卿意不欲親庖厨邪宜付右兵以爲永式河州
刺史梁景叡袍罕羌首恃遠不敬其賀正使人頻年稱
疾秦州刺史侯莫陳悅受其贈遺常爲送表世良並奏
科其罪帝嘉之謂長孫永業曰宋郎中實有家風甚可
重也後拜清河太守世良才識閑明尤善政術在郡未
幾聲問甚高陽平郡移掩劫盜三十餘人世良訊其情
狀唯送十二人餘皆放之陽平太守魏明朗大怒云輒
放吾賊及推問送者皆實放者皆非明朗大服郡東南
有曲堤成公一姓阻而居之羣盜多萃於此人爲之語

曰寧度東吳會稽不歷成公曲堤世良施八條之制盜
奔他境人又謠曰曲堤雖險賊何益但有宋公自屏跡
齊天保初大赦郡無一囚率羣吏拜詔而已獄內穉生
桃樹蓬蒿亦滿每日牙門虛寂無復訴訟者謂之神門
其冬醴泉出於界內及代至傾城祖道有老人丁金剛
者泣而前謝曰老人年九十記三十五政府君非唯善
政清亦徹底今失賢者人何以濟莫不攀轅涕泣後卒
於東郡太守贈信州刺史世良強學好屬文撰字略五
篇宋氏別錄十卷子伯宗位侍御史性清退好學多所
撰述至齊亡不徙職遂不入仕隋大業初卒於家世良

弟世軌

世軌幼自脩整好法律天保初歷三尚書三公二千石都官郎中兼并州長史執獄寬平多所全濟爲都官郎中有囚事枉將送垂致法世軌遣騎追止之切奏其狀遂免稍遷廷尉少卿洛州人聚結欲劫河橋吏捕案之連諸元徒黨千七百人崔昂爲廷尉以爲反數年不斷及世軌爲少卿判其事爲劫唯殺魁首餘從坐悉舍焉大理正蘇珍之以平幹知名寺中語曰決定嫌疑蘇珍之視表見裏宋世軌時人以爲寺中二絕南臺囚到廷尉世軌多雪之仍移攝御史將問其濫狀中尉畢義雲

不送移往復不止世軌遂上書極言義雲酷擅文宣引見二人親敕世軌曰我知臺欺寺久卿能執理抗衡但守此心勿慮不富貴敕義雲曰卿比所爲誠合死以志在疾惡故且一恕仍顧謂朝臣曰此二人並我骨鯁臣也及卒廷尉御史諸繫囚皆哭曰宋廷尉死我等豈有生路贈光州刺史諡曰平無子世良以第五子朝基嗣

翻弟世景

世景少自脩立事親以孝聞與弟道璵下帷讀誦博覽羣言尤精經義族兄弁甚重之舉秀才上第再遷彭城王總開府法曹行參軍總愛其才學雅相器敬孝文甚

嘉異之兼司徒法曹行參軍世景明刑理著律令裁決
疑獄剖判如流轉尚書祠部郎彭城王勰每稱曰宋世
景精微尚書僕射才也臺中疑事右僕射游肇常以委
之世景既才長從政加之夙勤不怠兼領數曹深著稱
績左僕射源懷引爲行臺郎巡察州鎮十有餘所黜陟
賞罰莫不咸允遷七鎮別置諸戍明設亭候以備不虞
懷大相委重還薦之宣武以爲不減李冲帝曰朕亦聞
之後爲伏波將軍行滎陽太守鄭氏豪橫號爲難制濟
州刺史鄭尚弟遠慶先爲苑陵令多所受納百姓患之
而世景下車召而誡之遠慶行意自若世景繩之以法

遠慶懼棄官亡走於是屬縣畏威莫不改肅終日坐於聽事未嘗寢息人間之事巨細必知發姦擿伏有若神明嘗有一吏休滿還郡食人鷄豚又有一幹受人一帽又食二鷄世景叱而告之吏幹叩頭伏罪於是上下震悚莫敢犯禁坐弟道璵事除名世景友于之性過絕於人及道璵死哭之酸感行路歲餘母喪遂不勝哀而卒世景曾撰晉書竟未得就遺腹子季儒位太學博士曾至譙宋間爲文弔嵇康甚有理致後夜寢室壞壓而殞時人悼傷惜之道璵少而敏俊自太學博士轉京兆王愉法曹行參軍坐愉反得罪作詩及挽歌詞寄之朋親

以見冤痛道璵又曾贈著作郎張始均詩其末章云子
深懷壁憂余有當門病道璵旣不免難始均亦遇世禍
時咸怪之道璵從孫孝王學涉亦好緝綴文藻形貌矧
陋而好臧否人物時論甚疾之爲北平王文學求入文
林館不遂因非毀朝士撰朝士別錄二十卷會周武滅
齊改爲關東風俗傳更廣聞見勒成三十卷以上之言
多妄謬篇第冗雜無著述體周大象末預尉迴事誅死
許彥字道謨高陽新城人也祖茂仕慕容氏高陽太守
彥少孤貧好讀書從沙門法叡受易太武徵令卜筮頻
驗遂在左右參與謀議彥質厚慎密與人言不及內事

帝以此益親待之賜爵武昌公拜相州刺史在州受納多違法度詔書切讓之然以彥腹心近臣弗之罪也卒謚宣公子熙襲熙卒子安仁襲安仁卒子元康襲降爵爲侯熙弟宗之歷位殿中尚書定州刺史封潁川公受敕討丁零旣平宗之因循郡縣求取不節深澤人馬超毀謗宗之宗之怒毆殺超超家人告狀宗之上超謗訕朝政文成聞之曰此必宗之懼罪誣超案驗果然遂斬於都市元康弟護州主簿子恂字伯禮頗有業尚閨門雍睦三世同居吏部尚書李神儁常稱其家風位司徒詔議參軍脩起居注拜大中大夫卒贈吏部尚書冀州

刺史恂弟惇

惇字季良清識敏速達於從政位司徒主簿以明斷見知時人號爲入鐵主簿稍遷陽平太守時遷都於鄴陽平爲畿郡軍國責辦賦斂無準又勳貴屬請朝夕徵求惇並御之以道咸以無怨政爲天下第一特加賞異圖形於闕詔頒天下歷魏尹齊梁二州刺史政並有治聲遷大司農會王思政入據潁城王師出討惇常督軍無乏絕引洧水灌城惇之策也遷殿中尚書惇美鬚下垂至帶省中號長鬣公齊文宣嘗因酒酣提惇鬚稱美以刀截之唯留一握惇懼因不復敢長人又號齊鬣公歷

御史中丞膠州刺史司農大理二卿再爲度支尚書太子少保少師光祿大夫開府儀同三司尚書右僕射特進賜爵萬年縣子食邑下邳郡幹惇年老致仕於家三年卒惇少純直晚更浮動齊朝體式本州大中正以京官爲之乾明中邢邵爲中書監德望甚高惇與邵競中正遂憑附宋欽道出邵爲刺史朝議甚鄙薄之雖久處朝行歷官清顯與邢邵魏收陽休之崔劼徐之才比肩同列諸人或談說經史或吟詠詩賦更相嘲戲欣笑滿堂惇不好劇談又無學術或坐杜口或隱几而睡不爲勝流所重子文紀武平末度支郎中文紀弟文經勤學

方雅身無擇行口無戲言武平末殿中侍御史隋開元
初侍御史兼通直散騎常侍聘陳使副主爵侍郎卒於
相州長史惇兄遜字仲讓有幹局乾明中平原太守卒
贈信州刺史遜子文高司徒掾

刁靡字淑和勃海饒安人也曾祖協從晉元帝度江居
京口位尚書令父暢晉右衛將軍初晉相劉裕微時負
社錢一萬違時不還暢兄達執而徵焉及誅桓玄以嫌
先誅刁氏靡與暢故吏遂奔姚興爲太子中庶子及姚
泓滅與司馬休之等歸魏請於南境自効明元假靡建
威將軍靡遂於河濟間招集流散傳檄邊境靡弟彌時

亦率衆入京口親共討裕裕頻遣兵破之明元南幸鄴
靡朝於行宮明元問曰縛劉裕者於卿親疎靡曰伯父
帝笑曰劉裕父子當應憚卿於是假靡鎮東將軍青州
刺史東光侯使別立義軍又詔靡令隨機立効靡於是
招集譙梁彭沛人五千餘家置二十七營遷鎮濟陰遷
徐州刺史賜爵東安伯後除薄骨律鎮將靡以西土乏
雨表求鑿渠溉公私田又奉詔以高平安定統萬及薄
骨律等四鎮出車牛五千乘運屯穀五十萬斛付沃野
以供軍糧道多深沙車牛艱阻求於牽屯山河水之次
造船水運又以所綰邊表常懼不虞造城儲穀置兵備

守詔皆從之詔卽名此城爲刁公城以旌功焉皇興中
靡與隴西王源賀及中書監高允等並以耆年特見優
禮錫靡几杖劔履上殿月致珍羞焉靡性寬柔好尚文
典手不釋書明敏多智凡所爲詩賦論頌并諸雜文百
有餘篇又汎施愛士恬靜寡欲篤信佛道著教誠一十
餘篇以訓子孫太和八年卒年九十五諡曰簡子遵
遵字奉國襲爵遵少不拘小節長更脩改太和中例降
爲侯嘗經篤疾幾死見有神明救之言福門子當享長
年後卒於洛州刺史諡曰惠侯子楷早卒楷子冲

冲字文朗十三而孤孝慕過人其祖母司空高允女聰

明婦人也哀其早孤撫養尤篤沖免喪後便志學他方高氏泣涕留之沖終不止雖家世貴達及從師於外自同諸生于時學制諸生悉日直監厨沖雖有僕隸不令代己身自炊爨每師受之際發志精專不捨晝夜殆忘寒暑學通諸經偏脩鄭說陰陽圖緯筭數天文風氣之書莫不關綜當世服其精博刺史郭祚聞其盛名訪以疑義沖應機解辯無不祛其久惑後太守范陽盧尚之刺史河東裴桓並徵沖爲功曹主簿非所好也受署而已不關事務唯以講學爲心四方學徒就其受業者歲有數百沖雖儒生而執心壯烈不畏強禦延昌中帝舅

司徒高肇擅恣威權沖乃抗表極言其事辭旨懇直文
義忠憤太傅清河王懌覽而歎息先是沖曾祖靡作行
孝論以誠子孫稱古之葬者衣之以薪不封不樹後世
聖人易之以棺槨至秦以後生則不能致養死則厚葬
過度及於末世至蘧蔭裹尸俛而葬者確而爲論並非
折衷旣知二者之失豈宜同之當令所存者棺厚不過
三寸高不過三尺弗用繪綵歛以時服輜車且用白布
爲幔不加畫飾名爲清素車又去挽歌方相并明器雜
物及沖祖遵將卒敕其子孫令奉靡遺旨河南尹丞張
普惠謂爲太儉貽書於沖叔整令與通學議之沖乃致

書國學諸儒以論其事學官竟不能答神麈末冲以嫡傳祖爵東安侯京兆王繼爲司空也並以高選頻辟記室參軍明帝將親釋奠於是國子助教韓神固與諸儒詣國子祭酒崔光吏部尚書甄琛舉其才學奏而徵焉及卒國子博士高涼及范陽盧道侃盧景裕等復上狀陳冲業行議奏諡曰安憲先生祭以太牢子欽字志儒早亡楷弟整字景智少有大度頗涉書史太和十五年爲奉朝請孝文都洛親自臨選除司空法曹參軍累遷黃門郎普泰初假征東大將軍滄冀瀛三州刺史大都督尋加車騎將軍右光祿大夫遂逢本鄉賊亂奉母客

於齊州既而母卒母卽高允之女崔光崔亮皆經允接
待是以涼燠之際光等每致拜焉天平四年卒於鄴贈
司空公諡曰文獻整解音律輕財好施交結名勝聲酒
自娛然貪而好色爲議者所貶子柔

柔字子溫少好學留心儀禮性强記至於氏族內外皆
所諳悉居母喪以孝聞初爲魏宣武挽郎解巾司空行
參軍齊天保初累遷國子博士中書令魏收撰魏史啓
柔等同其事柔性專固自是所聞收常嫌憚又參議律
令時議者以爲五等爵邑承襲無嫡子立嫡孫無嫡孫
立嫡子弟無嫡子弟立嫡孫弟柔以爲無嫡孫應立嫡

曾孫不應立嫡子弟議曰案禮立嫡以長故謂長子爲嫡子嫡子死以嫡子之子爲嫡孫死則曾立亦然然則嫡子之名本爲傳重故喪服曰庶子不爲長子三年不繼祖與禰也禮公儀仲子之喪檀弓曰我未之前聞也仲子舍其孫而立其子何也子服伯子曰仲子亦猶行古之道也昔者文王舍伯邑考而立武王發微子舍其孫臚而立其弟衍鄭注曰仲子爲親者諱耳立子非也文王之立武王權也微子嫡子死立弟衍殷禮也子游問諸孔子孔子曰不立孫注商以嫡子死立嫡子之母弟周以嫡子死立嫡子之子爲嫡孫故春秋公羊之義

嫡子有孫而死質家親親先立弟文家尊尊先立孫喪服云爲父後者爲出母無服小記云祖父卒而後爲祖母後者三年爲母無服喪者不祭故也爲祖母三年者大宗傳重故也今議以嫡孫死而立嫡子母弟嫡子母弟者則爲父後矣嫡子母弟本非承嫡以無嫡故得爲父後則嫡孫之弟理亦應得爲父後則是父卒然後爲祖後者服斬旣得爲祖服斬而不得爲傳重未之聞也若用商家親親之義本不應舍嫡子而立嫡孫若從周家尊尊之文豈宜舍其孫而立其弟或文或質愚用惑焉小記云嫡婦爲舅姑後者則舅姑爲之小功注云謂

夫有廢疾他故若死無子不受重者小功庶婦之服凡
父母於子舅姑於婦將不傳重於嫡及將所傳重者非
嫡服之皆如衆子庶婦也言死無子者謂絕世無子非
謂無嫡子如其子焉得云無後夫雖廢疾無子婦猶以
嫡爲名嫡名旣在而欲廢其子者如禮何有損益革代
相沿必謂宗嫡可得而變者則爲後服斬亦宜有因而
改七年卒柔在史館未久勒成之際志在偏黨魏書中
與其內外通親者並虛美過實爲時論所譏整弟宣字
季達以功封高城縣侯歷位都官尚書衛大將軍滄州
刺史卒贈太尉公諡曰武刁氏世有榮貴而門風不甚

脩潔爲時所鄙，離族孫雙，字子山高祖，藪晉齊郡太守。藪因晉亂居青州，安樂至，雙始歸本鄉。雙少好學，兼涉文史，雅爲中山王英所知，賞位西河太守，爲政清簡。吏人安悅，及中山王熙起兵，誅元，又事敗，熙弟略投命於雙，雙藏護。周年時，購略甚切，略懼，求送出境。雙曰：「會有一死，所難過耳。」今遭知己，視死如歸，願不以爲慮。略復苦求，南轉雙，乃遣從子昌送達江左。靈太后反，政知略因雙獲濟，徵拜光祿大夫。時略姊饒安主刁宣妻也。頻訴靈太后，乞徵略還朝廷，乃以徐州所獲俘江革祖暉二人，易之以雙。與略有舊，乃令至境，迎接。明帝末際。

西兗州刺史時賊盜蜂起州人張桃弓等招聚亡命公
行劫掠雙至境先遣使諭桃弓陳示禍福桃弓卽隨使
歸罪雙捨而不問後有盜發之處令桃弓追捕咸悉禽
獲於是州境清肅孝莊初行濟州刺史以功封曲成鄉
男孝武初遷驍騎大將軍左光祿大夫興和三年卒贈
車騎大將軍儀同三司齊州刺史諡曰清穆

辛紹先隴西狄道人也五世祖怡晉幽州刺史父深仕
西涼爲驍騎將軍及涼後主歆與沮渠蒙遜戰於蓼泉
軍敗失馬深以所乘授歆而身死於難以義烈見稱西
上涼州平紹先內徙家於晉陽明敏有識量與廣平游

明根范陽盧度世同郡李承昭等甚相友有至性丁父
憂三年口不甘味頭不櫛沐髮遂落盡故常著垂裙阜
帽自中書博士轉神部令皇興中薛安都以彭城歸魏
時朝廷欲綏安初附以紹先爲下邳太守爲政不甚曠
察舉其大綱而已唯教人爲產禦賊之備及宋將陳顯
達蕭道成蕭順之來寇道成謂順之曰辛紹先未易侵
也宜共慎之於是不歷郡境徑屯呂梁卒於郡贈并州
刺史晉陽侯謚曰惠子鳳達耽道樂古有長者之名卒
於京兆王子推國常侍鳳達子祥字萬福舉司州秀才
再遷司空主簿咸陽王禧妃卽祥妻之妹也及禧構逆

親知多羅塵謗祥獨蕭然不預轉并州平北府司馬有
白璧還兵藥道顯被誣爲賊官屬咸疑之祥曰道顯面
有悲色察獄以色其此之謂乎苦執申之月餘別獲真
賊後除郢州龍驤府長史帶義陽太守白早生之反也
梁遣來援因此緣淮鎮戍相繼降沒唯祥堅城固守梁
又遣將胡武城陶平虜於州南金山之上連營侵逼祥
出其不意襲之賊大崩禽平虜斬武城以送京師州境
獲全論功方有賞授而刺史婁悅恥勳出其下間之執
政事竟不行胡賊劉龍駒作逆華州除祥安定王燮征
虜府長史仍爲別將與討胡使薛和滅之卒贈南青州

刺史祥弟少雍字季和少聰穎有孝行尤爲祖父紹先所愛紹先性嗜羊肝常呼少雍共食及紹先卒少雍終身不食肝性仁厚有禮義門內之法爲時所重稍遷司空高陽王雍田曹參軍少雍清正不憚強禦積年久訟造次決之請託路絕時稱賢明正始中詔百官各舉所知高陽王雍及吏部郎中李憲俱以少雍爲舉首卒於給事中少雍妻王氏有德義少雍與從弟懷仁兄弟同居懷仁等事之甚謹閨門禮讓人無間焉士大夫以此稱美子元桓武定中儀同府司馬元桓弟士遜太師開府功曹參軍鳳達弟穆字叔宗舉茂才東雍州別駕初

隨父在下邳與彭城陳敬文友善敬文弟敬武少爲沙門從師遠學經久不返敬文病臨卒以雜綾二十四匹託穆與敬武穆久不得見經二十年始於洛陽見敬武以物還之封題如故世稱廉信歷東荊州司馬轉長史帶義陽太守領戍雅有恤人之志再轉汝陽太守遇水澇人飢上表請輕租賦帝從之遂敕汝陽一郡聽以小絹爲調除平原相徵爲征虜將軍太中大夫未發卒於郡贈後將軍幽州刺史子子馥字元穎早有學行累遷平原相父子並爲此郡吏人懷安之元顥入洛子馥不從莊帝反政封三門縣男天平中除太尉府司馬白山連

接三齊瑕丘數州之界多有賊盜子馥受使檢覆因辯山谷要害宜立鎮戍之所又諸州豪右在山鼓鑄姦黨多依之又得密造兵仗上表請破罷諸冶朝廷善而從之後卒於清河太守子馥以三傳經同說異遂總爲一部傳注並出校比短長會亡未就

韋閻字友觀京兆杜陵人也世爲三輔冠族祖楷晉長樂清河二郡太守父達慕容垂大長秋卿閻少有器望遇慕容氏政亂避地薊城太武初徵拜咸陽太守轉武都太守卒郡子範試守華山郡賜爵高平男卒範子儁字穎超早有學少孤事祖母以孝聞性溫和廉讓爲州

里所稱太和中襲爵歷位都水使者宣武崩領軍于忠
矯擅威刑儁與左僕射郭祚昏嫁故亦同時遇害臨終
訴枉於尚書元欽欽知而不敢申理儁歎曰吾一生爲
善未蒙善報常不爲惡今爲惡終悠悠蒼天抱直無訴
時人咸怨傷焉熙平元年追贈洛州刺史諡曰貞子子
粲

子粲字暉茂齊王蕭寶夤爲雍州刺史引爲府主簿轉
錄事參軍及寶夤反子粲與弟子爽執志不從相率逃
免雍州平賜爵長安子普泰中累遷中書侍郎孝武帝
入關子粲歷行臺左丞南汾州刺史少弟道諧爲鎮城

都督元象中齊神武命將出討子粲及道諧俱被獲送於晉陽子粲累遷南兗州刺史齊天保初封西曠縣男後卒於豫州刺史諡曰忠子粲兄弟十三人並有孝行居父喪毀瘠過禮既葬廬於墓側負土成墳弟榮亮最知名榮亮字子昱博學有文才德行仁孝爲時所重歷諫議大夫衛大將軍卒贈河州刺史子綱字世紀有操行才學見稱領袖本州調爲中正開皇中位趙州長史有子文宗文闕並知名閭從叔道福父羆爲苻堅丞相王猛所器重以女妻焉仕堅爲東海太守堅滅奔江左仕宋爲秦州刺史道福有志略仕宋位盱眙南沛二郡

太守領鎮北府錄事參軍與徐州刺史薛安都謀擁州
內附賜爵高密侯因家彭城卒贈兗州刺史諡曰簡子
欣宗以歸國勳別賜爵杜縣侯歷位大中大夫行幽州
事卒贈南兗州刺史諡曰簡閔從子崇字洪基父肅字
道壽隨劉義真度江位豫州刺史崇年十歲父卒母鄭
氏攜以入魏因寓居河洛少爲舅兗州刺史鄭義所器
賞位司徒從事中郎孝文納其女爲充華嬪除南潁川
太守不好發擿細事恒云何用小察以傷大道吏人感
之郡中大安帝聞而嘉賞賜帛二百匹遷洛以崇爲司
州中正尋除咸陽王禧開府從事中郎復爲河南邑中

正崇頻居衡品以平直見稱出爲鄉郡太守更滿應代
吏人詣闕乞留復延三年後卒子猷之釋褐奉朝請轉
給事中步兵校尉稍遷前後將軍太中大夫卒猷之弟
休之貞和自守未嘗言行忤物歷位給事中河南邑中
正安西將軍光祿大夫卒子道建道儒聞族弟珍字靈
智孝文賜名焉父子尚字文叔位樂安王良安西府從
事中郎卒贈雍州刺史珍少有志操歷位尚書南部郎
孝文初蠻首桓誕歸款朝廷思安邊之略以誕爲東荆
州刺史令珍爲使與誕招慰蠻左珍至桐柏山窮淮源
宣揚恩澤莫不懷附淮源舊有祠堂蠻俗恒用人祭之

珍乃曉告曰天地明靈卽人之父母豈有父母甘子肉
味自今宜悉以酒脯代用羣蠻從約自此而改凡所招
降七萬餘戶置郡縣而還以奉使稱旨賜爵霸城子後
以軍功進爵爲侯累遷顯武將軍郢州刺史所在有聲
績朝廷嘉之遷龍驤將軍賜驂騮二匹帛五十匹穀三
百斛珍乃召集州內孤貧者謂曰天子謂我能撫綏卿
等故賜以穀帛吾何敢獨當遂以所賜悉分與之尋轉
荊州刺史與尚書盧陽烏征赭陽爲齊將垣歷生蔡道
恭所敗免歸鄉里臨別謂陽烏曰主上聖明志吞吳會
用兵機要在於上流若有事荆楚恐老夫復不得停耳

後車駕征鄧沔復起珍爲中軍大將軍彭城王勰長史
鄧沔旣平試守魯陽郡孝文復南伐路經珍郡加中壘
將軍正太守珍從至清水帝曰朕頃戎車再駕卿伯翼
務中軍今日之舉亦欲引卿同行但三鷗嶮要非卿無
以守也因敕還及孝文崩於行宮祕匿而還至珍郡始
發大諱還除中散大夫尋加鎮遠將軍太尉諮議參軍
卒贈本將軍青州刺史諡曰懿長子纘字遵彥年十三
補中書學生聰敏明辯爲博士李彪所稱再遷侍御中
散孝文每與德學沙門談論往復纘掌綴錄無所遺漏
頗見知賞累遷長兼尚書左丞壽春內附尚書令王肅

出鎮揚州請纘行爲州長史加平遠將軍帶梁郡太守
肅薨敕纘行州事任城王澄代肅爲州復啓纘爲長史
澄出征之後梁將姜慶真乘虛攻襲遂據外郭雖尋克
復纘坐免官卒纘弟彧字遵慶亦有學識解褐奉朝請
稍遷平遠將軍東豫州刺史綏懷蠻左頗得其心蠻酋
田益宗子魯生魯賢先叛父南入數爲寇掠自彧至州
魯生等咸戢啓脩敬不復爲害彧以蠻俗不識禮儀乃
立太學選諸郡生徒於州總教又於城北置崇武館以
習武焉州境清肅罷還遇大將軍京兆王繼西征請爲
長史尋以本官兼尚書爲幽夏行臺以功封陰盤縣男

卒贈撫軍將軍雍州刺史謚曰文子彪襲孝莊末爲藍田太守因仕關西彪弟融以軍功賜爵長安伯稍遷大司馬開府司馬融娶司農卿趙郡李瑾女疑其妻與章武王景哲姦通乃刺殺之懼亦自殺弟肅字遵顯少有志業年十八辟州主簿時屬歲儉肅以家粟造粥以飼飢人所活甚衆解褐太學博士稍遷右軍將軍爲荆郢和糶大使南郢州刺史田夷啓稱肅父珍往任荊州恩洽夷夏乞肅充南道別將領荊州驍勇共爲腹背詔從之未幾行南荊州事遷東徐州刺史梁遣其郢州刺史田麤禧率衆來寇肅於石羊岡破斬之以功封杜縣子

卒於侍中雍州刺史諡曰宣長子鴻字道衍頗有幹用
累遷中書舍人天平三年坐漏泄賜死於家

杜銓字士衡京兆人晉征南將軍預五世孫也祖胄苻
堅太尉長史父嶷慕容垂祕書監仍僑居趙郡銓學涉
有長者風與盧玄高允等同被徵爲中書博士初密太
后父豹喪在濮陽太武欲令迎葬於鄴謂司徒崔浩曰
天下諸杜何處望高朕今方改葬外祖意欲取杜中長
老一人以爲宗正令營護凶事浩曰京兆爲美中書博
士杜銓其家今在趙郡是杜預後於今爲諸杜最密召
見銓器貌瓌雅太武感悅謂浩曰此真吾所欲也以爲

宗正令與杜超子道生送豹喪柩致葬鄴南銓遂與超如親超謂銓曰既是宗正何緣僑居趙郡乃延引同屬魏郡再遷中書侍郎賜爵新豐侯卒贈相州刺史魏縣侯諡曰宣子振字季元舉秀才卒於中書博士振子遇字慶期位尚書起部郎竊官材瓦起立私宅清論鄙之卒於河東太守贈都官尚書豫州刺史諡曰惠銓族孫景字宣明學通經史州府交辟不就景子裕字慶延雖官非貴仕而文學相傳仕齊位止樂陵令齊亡退居教授終于家子正立字知禮少傳家業耽志經史隋開皇十五年舉秀才試策高第曹司以策過左僕射楊素怒

曰周孔更生尚不得爲秀才刺史何忽妄舉此人可附
下考乃以策抵地不視時海內唯正玄一人應秀才餘
常貢者隨例銓注訖正玄獨不得進止曹司以選期將
盡重以啓素素志在試退正玄乃手題使擬司馬相如
上林賦王褒聖主得賢臣頌班固燕然山銘張載劔閣
銘白鸚鵡賦曰我不能爲君住宿可至未時令就正玄
及時並了素讀數徧大驚曰誠好秀才命曹司錄奏屬
吏部選期已過注色令還期年重集素謂曹司曰秀才
杜正玄至又試官人有奇器闕並立成文不加點素大
嗟之命吏部優敘曹司以擬長寧王記室參軍時素情

背曹官及見曰小王不盡其才也晉王廣方鎮揚州妙選府寮乃以正玄爲晉王府參軍後豫章王鎮揚州又爲豫章王記室卒正玄弟正藏字爲善亦好學善屬文開皇十六年舉秀才時蘇威監選試擬賈誼過秦論及尚書湯誓匠人箴連理樹賦几賦弓銘應時並就又無點竄時射策甲第者合奏曹司難爲爲奏抑爲乙科正藏訴屈威怒改爲景第授純州行參軍遷梁郡下邑縣正大業中與劉炫同以學業該通應詔被舉時正藏弟正儀貢充進士正倫爲秀才兄弟三人同時應命當世嗟美之著作郎王劭奏追脩史司穀大夫薛道衡奏擬

從事並以見任且放還九年從駕征遼爲夫餘道行軍
長史還至涿郡卒正藏爲文迅速有如宿構曾令數人
並執紙筆各題一文正藏口授俱成皆有文理爲當時
所異又爲文軌二十卷論爲文體則甚有條貫後生寶
而行之多資以解褐大行於世謂之杜家新書云

論曰宋隱操行貞白遺略榮名宣悖並保退素咸見徵
辟可謂德門者矣義和以才度見知迹參顧命拔萃出
類當有以哉無子之歎豈徒羊舌宗祀不亡蓋其幸也
翻剛鯁自立猛而斷務世良昆季雅有家風道謨卜筮
取達季良累於學淺刁靡才識恢遠著聲立事禮遇優

隆世有人爵堂構之義也辛韋不殞門風杜銓所在爲
重正立難兄難弟信爲美哉

北史卷二十六

北史卷二十六考證

宋隱傳隱弟宣○魏書宣爲隱從弟乃洽之子也

弁傳且常侍者黃門之麤冗○麤冗監本訛庶見今改
從魏書

世景傳每稱曰宋世景精微尚書僕射才也○微魏書
作識

刁靡傳小記云嫡婦爲舅姑後者則舅姑爲之小功○
嫡婦下齊書有不字

有損益革代相沿○齊書禮有損益代相沿革

辛紹先傳鳳達弟穆○達監本訛達今從上文子鳳達

改正

韋閻傳儁與左僕射郭祚昏嫁○嫁魏書作家

子粲傳閻從叔道福父黶○黶監本訛罷今改從魏書
稍遷前後將軍○魏書無後字

蠻俗恒用人祭之○俗監本作俚今從魏書及閣本

北史卷二十六考證

北史卷二十七

唐

李

延

壽

撰

列傳第十五

屈遵

張蒲

谷渾

會孫楷

公孫表

張濟

李先

賈彝

竇瑾

李訢

韓延之

袁式

毛修之

嚴稜
朱修之

唐和

寇讚

孫儁

酈範

子道元

韓秀

堯暄

孫雄

柳崇

屈遵字子度昌黎徒何人也博學多才藝慕容垂以爲博陸令道武南伐博陵太守申永南奔河外高陽太守

崔宏東走海濱屬城長吏率多逃竄遵獨歸道武道武
素聞其名拜中書令中原旣平賜爵下蔡子卒子須襲
爵除長樂太守進爵信都侯卒贈昌黎公諡曰恭須長
子恒字長生沉粹有局量歷位尚書右僕射加侍中以
破平涼功賜爵濟北公太武委以大政車駕出征常居
中留鎮與襄城公盧魯元俱賜甲第真君四年墜馬卒
時帝幸陰山景穆遣使乘傳奏狀帝甚悼惜之謂使人
曰汝等殺朕良臣何用乘馬遂令步歸贈征南大將軍
諡曰成公子道賜襲爵道賜善騎射機辨有辭氣太武
甚器之位尚書右僕射加侍中卒諡曰哀公子拔襲爵

帝追思其父祖年十四以爲南部大人時太武南伐禽
守將胡盛之以付拔酒醉不覺盛之逃太武令斬之將
伏鑕帝愴然曰若鬼有知長生問其子孫朕將何以應
乃赦拔後獻文以其功臣子拜營州刺史

張蒲字玄則河內修武人也本名謨父攀仕慕容垂位
兵部尚書以清方稱蒲少有父風仕慕容寶爲尚書左
丞道武定中山寶官司敘用多降品秩帝旣素聞蒲名
仍拜尚書左丞明元卽位爲內都大官賜爵泰昌子參
決庶獄私謁不行後改爲壽張子太武卽位以蒲清貧
妻子衣食不給乃以爲相州刺史扶弱抑彊進善黜惡

風化大行卒於官吏人痛惜之蒲在謀臣之列屢出爲將朝廷論之常以爲稱首贈平東將軍廣平公諡曰文恭子昭襲以軍功進爵修武侯位幽州刺史以善政見稱

谷渾字元沖昌黎人也父袞彎弓三百斤勇冠一時仕慕容垂位廣武將軍渾少有父風任俠好氣晚乃折節授經業被服類儒者道武時以善隸書爲內侍左右太武時累遷侍中儀曹尚書賜爵濮陽公渾正直有操行性不苟合然愛重舊故不以富貴驕人時人以此稱之在官廉正爲太武所器重以渾子孫年十五以上悉補

中書學生卒諡曰文宣子闡字崇基襲爵位外都大官
卒諡曰簡公子洪字元孫位尚書賜爵滎陽公性貪奢
僕妾衣服錦綺時獻文舅李峻等初至官給衣服洪輒
截沒爲有司所糾并窮其前後贓罪伏法子穎位太府
少卿卒贈營州刺史諡曰貞子士恢字紹達位鴻臚少
卿封元城縣侯太后嬖幸鄭儼懼紹達間構於帝因言
次以紹達爲州紹達耽寵不願出太后誣其罪殺之渾
曾孫楷楷有幹局稍遷奉車都尉眇一目性甚嚴忍前
後奉使皆以酷暴爲名時人號曰瞎武累遷城門校尉
卒

公孫表字玄元燕郡廣陽人也爲慕容沖尚書郎慕容垂破長子從入中山慕容寶走乃歸爲博士初道武以慕容垂諸子分據勢要權柄推移遂至亡滅表詣闕上韓非書二十卷道武稱善明元初賜爵固安子河西飢胡劉武反於上黨詔表討之爲胡所敗帝深銜之泰常七年宋武帝殂時議取河南侵地以奚斤爲都督以表爲吳兵將軍廣州刺史表旣剋滑臺遂圍武牢車駕次汲郡始昌子蘇坦太史令王亮奏表置軍武牢東不得形便之地故令賊不時滅明元雅好術數又積前忿及攻武牢士卒多傷乃使人夜就帳中縊殺之以賊未退

祕而不宣初表與勃海封愷友善後爲子求愷從女愷不許表甚銜之及封氏爲司馬國璠所逮帝以舊族欲原之表證其罪乃誅封氏表外和內忌時人以此薄之表本與王亮同營署及其出也輕侮亮故及於死第二子軌字元慶明元時爲中書郎出從征討補諸軍司馬太武平赫連昌引諸將帥入其府藏各令任意取金玉諸將取之盈懷軌獨不取帝把手親探金賜之謂曰卿臨財廉朕所以增賜者欲顯廉於衆人後兼大鴻臚持節拜立氏楊玄爲南秦王及境玄不郊迎軌數玄無蕃臣禮玄懼詣郊受命使還稱旨拜尚書賜爵燕郡公出

爲武牢鎮將初太武將北征發驢以運糧使軌部調雍州軌令驢主皆加絹一匹乃與受之百姓語曰驢無彊弱輔脊自壯衆共嗤之坐徵還卒軌旣死帝謂崔浩曰吾過上黨父老皆曰公孫軌爲將受貨縱賊使至今餘姦不除軌之罪也其初來單馬執鞭及去從車百兩載物而南丁零渠帥乘山罵軌軌怒取罵軌者之母以矛刺其陰而死之曰何以生此逆子從下到劈分磔四支於山樹上是忍行不忍之事軌幸而早死至今在者吾必族誅之軌終得娶封氏生子叡字叔文位儀曹長賜爵陽平公時獻文於苑內立殿敕中祕羣官制名叡奏

曰臣聞至尊至貴莫崇於帝王天人挹損莫大於謙光
臣愚以爲宜曰崇光奏可卒於南部尚書諡曰宣叡妻
崔浩弟女也生子良字遵伯聰明好學爲尚書左丞爲
孝文所知遇良弟衡字道津良推爵讓之仕至司直良
以別功賜爵昌平子崇基襲軌弟質字元直有經義
爲中書學生稍遷博士太武征涼州留宜都王穆壽輔
景穆時蠕蠕乘虛犯塞京師震恐壽雅信任質爲謀主
質性好卜筮卜筮者咸云必不來故不設備由質幾敗
國後屢進讜言超遷尚書卒贈廣陽侯諡曰恭第二子
邃字文慶位南部尚書封襄平伯出爲青州刺史以邃

在公遺迹可紀下詔褒述卒官孝文在鄴宮爲之舉哀時百度唯新青州佐吏疑爲遠服詔曰專古也理與今違專今也大乖曩義當斟酌兩途商量得失人吏之情亦不可苟順也主簿云近代相承服斬過葬便可如故自餘無服大成寥落可準諸境內之人爲齊衰三月子同始襲爵卒於給事中遂叡爲從父兄弟叡才器小優又封氏之男崔氏之壻遂母鴈門李氏地望懸隔鉅鹿太守祖季真多識北方人物每云士大夫當須好婚親二公孫同堂兄弟耳吉凶會集便有士庶之異

張濟字士度西河人也父千秋慕容永驍騎將軍永滅

來奔道武善之拜建節將軍賜爵成紀侯濟涉獵書傳
清辯善儀容道武愛之與公孫表等俱爲行人拜散騎
侍郎襲爵先是晉雍州刺史楊佺期乞師於常山王遵
以禦姚興帝遣濟爲遵從事卽報之濟自襄陽還帝問
濟江南事濟曰司馬昌明死子德宗代立君弱臣彊全
無綱紀佺期問臣魏初伐中山幾十萬衆臣答曰十餘
萬佺期曰魏被甲戎馬可有幾匹臣答中軍精騎十餘
萬外軍無數佺期曰以此討羌豈不滅也又曰魏定中
山徙幾戶於北臣答七萬餘家佺期曰都何城臣答都
平城佺期曰有此大衆何用城爲又曰魏帝欲爲久都

平城將移也臣答非所知也佗期間朝廷不都山東貌有喜色曰洛城救援仰恃於魏若獲保全當必厚報如爲羌所乘寧使魏取道武嘉其辭厚賞其使許救洛陽後以累使稱旨拜勝兵將軍卒子多羅襲爵坐事除

李先字容仁中山盧奴人少好學善占相術慕容永迎爲謀主勸永據長子城仕永位祕書監永滅徙中山皇始初先於井陘歸道武問先日卿何國人祖父及身悉歷何官先日臣本趙郡平棘人大父重晉平陽太守大將軍右司馬父懋石季龍樂安太守左中郎將臣苻丕左主客郎慕容永祕書監高密侯車駕還代以先爲尚

書右中兵郎再遷博士定州大中正帝問先何者最善
可以益人神智先曰唯有經書三皇五帝政化之典可
以補王者神智又問朕欲集天下書籍如何對曰主之
所好集亦不難帝於是班制天下經籍稍集大武討姚
興於柴壁也問計於先對曰兵以正合戰以奇勝聞姚
興欲屯兵天渡利其糧道及其到前遣奇兵先邀天渡
柴壁左右嚴設伏兵備其表裏興欲進不得住又乏糧
夫高者爲敵所棲深者爲敵所囚兵法所忌而敵居之
可不戰而取帝從其計興果敗歸明元卽位問左右舊
臣中誰爲先帝所親信新息公王洛兒曰有李先者爲

先帝所知俄而召先讀韓子連珠論二十二篇太公兵法十一事詔有司曰先所知者皆軍國大事自今當宿於內賜先絹綵及御馬一匹拜安東將軍壽春侯賜隸戶二十二卒於內都大官年九十五詔賜金縷命服一襲贈定州刺史中山公諡曰文懿子國襲爵國子鳳中書博士鳳子預字元凱太和初歷祕書令齊郡王友征西大將軍長史帶馮翊太守府解罷郡遂居長安羨古人殮玉法乃採訪藍田躬往攻掘得若環璧雜器形者大小百餘頗有麤黑者亦篋盛以還至而觀之皆光潤可玩預乃椎七十枚爲屑食之餘多惠人後預及聞者

更求玉於故處皆無所見馮翊公源懷弟得其玉琢爲
器佩皆鮮明可寶預服經年云有効驗而世事寢食皆
不禁節又加好酒損志及疾篤謂妻子曰吾酒色不絕
自致於死非藥過也然吾尸體必當有異勿速殯令後
人知殮服之妙時七月中旬長安毒熱預停屍四宿而
體色不變其妻常氏以玉珠二枚哈之口閉常謂曰君
自云殮玉有神驗何不受哈言訖齒啓納珠因噓其口
都無穢氣舉斂於棺堅直不傾委死時有遺玉屑數升
囊盛納諸棺中先少子皎天興中密問先日子孫永爲
魏臣將復事他姓邪先曰國家政化長遠不可紀極皎

爲寇謙之弟子遂服氣絕粒數十年隱於恒山年九十餘顏如少童一旦沐浴冠帶家人異之俄而坐卒道士咸稱其得尸解仙道皎孫義徽太和中以儒學博通有才華補清河王懌府記室牋書表疏文不加點清典贍速當世稱之又爲懌撰輿地圖及顯忠錄性好老莊甚嗜釋教靈太后臨朝屬有沙門惠憐以呪水飲人云能愈疾百姓奔湊日以千數義徽白懌稱其妖妄因令義徽草奏以諫太后納其言元乂惡懌徙義徽都水使者俄而懌被害因棄官隱於大房山少子蘭以純孝著聞不受辟召孝昌中旌表門閭正光中文宣王亶嗣位思

義徽雅正惇篤薦其孫景儒位至奉車都尉自皇始至齊受禪百五十歲先之所言有明徵焉景儒子昭徽博涉稽古脫略不羈時人稱其爲播郎因以字行於燕趙焉善談論有宏辯屬文任氣不拘常則志好隱逸慕葛洪之爲人尋師訪道不遠千里遇高尚則傾蓋如舊見庸識雖王公蔑如初爲道士中年應詔舉爲高唐尉大業中將妻子隱於嵩山號黃冠子有文集十卷爲學者所稱

賈彝字彥倫本武威姑臧人也六世祖敷魏幽州刺史廣川都亭侯子孫因家焉父爲苻堅鉅鹿太守坐訕謗

繫獄彝年十歲詣長安訟父獲申遠近歎之僉曰此子
英英賈誼之後莫之與京弱冠爲慕容垂遼西王農記
室參軍道武先聞其名常遣使者求彝於垂垂彌增器
敬垂遣其太子寶來寇大敗於參合執彝及其從兄代
郡太守潤等道武卽位拜尚書左丞參預國政天賜末
彝請詣溫陽療疾爲叛胡所掠送於姚興積數年遁歸
又爲赫連屈丐所執拜祕書監卒太武平赫連昌子秀
迎其尸柩葬於代南秀位中庶子賜爵陽都男本州大
中正獻文卽位進爵陽都子時丞相乙渾妻庶姓而求
公主之號屢言於秀秀默然後因公事就第見渾渾夫

妻同坐厲色曰爾管攝職事無所不從我請公主不應
何意秀慷慨大言對曰公主之稱王姬之號尊寵之極
非庶族所宜秀寧就死於今朝不取笑於後日渾左右
莫不失色爲之振懼秀神色自若渾夫妻默然忿他
日乃書太鑿給事楊惠富臂作老奴官慳字令以示秀
渾每欲伺隙陷之會渾伏誅遂免難時秀與中書令勃
海高允俱以儒舊重於時皆選擬方岳以詢訪被留各
聽長子出爲郡秀固讓不受許之自始及終歷奉五帝
雖不至大官常當機要廉清儉約不營資產年七十二
遇疾詔給醫藥賜几杖時朝廷舉動及大事不決每遣

尚書高平公李敷就第訪決卒贈冀州刺史武邑公諡曰簡子儁字異隣襲爵位荊州刺史依例降爵爲伯先是上洛置荊州後改爲洛州在重山人不知學儁表置學官在州五載清靖寡事爲吏人所安卒贈兗州刺史子叔休襲爵潤曾孫禎字叔願學涉經史居喪以孝聞太和中以中書博士副中書侍郎高聰使江左還以母老患輒在家定省坐免官後爲司徒諮議參軍通直散騎常侍加冠軍將軍卒贈齊州刺史禎兄子景雋亦以學識知名爲京兆王愉府外兵參軍愉起逆於冀州將授其官不受死之贈河東太守諡曰貞景儁弟景輿清

峻鯁正爲州士，遂擢，避不仕。後，葛榮陷冀州，稱疾不拜。景興每捫膝而言曰：吾不負汝，以不拜榮也。

竇瑾，字道瑜，頓丘衛國人。自云漢司空融之後也。高祖成頓丘太守，因家焉。瑾少以文學知名，自中書博士爲中書侍郎，賜爵繁陽子，參軍國謀，屢有功，進爵衛國侯，轉四部尚書。初定三秦，人猶去就，拜長安鎮將毗陵公。在鎮八年，甚著威惠，徵爲殿中都官尚書。太武親待之，賞賜甚厚。從征蓋吳，吳平，留瑾鎮長安。還京，復爲殿中都官典左右執法。太武歎曰：國之良輔，毗陵公之謂矣。出爲冀州刺史，清約沖素，著稱當時。還爲內都大官興。

光初瑾女婿鬱林公司馬彌陀以選尚臨涇公主瑾教
彌陀辭託有誹謗呪詛之言與彌陀同誅唯少子遵逃
匿得免遵善楷篆北京諸碑及臺殿樓觀宮門題署多
遵書位濮陽太守多所受納其子僧演姦通人婦爲部
人賈邈告坐免後以善書拜庫部令卒官

李訢字元盛小名真奴范陽人也曾祖產產子績二世
知名於慕容氏父崇馮跋吏部尚書石城太守車駕至
和龍崇率十餘郡歸降太武甚禮之呼曰李公爲北幽
州刺史固安侯卒諡曰襄侯訢母賤爲諸兄所輕崇曰
此子之生相者言貴吾每觀或未可知遂使入都爲中

書學生太武幸中書學見而異之指謂從者曰此小兒終效用於朕之子孫因識眇之帝舅陽平王杜超有女將許貴戚帝曰李訢後必官達益人門戶可以妻之遂勸成婚南人李哲常言訢必當貴達杜超之死也帝親哭三日訢以超女壻得在喪位出入帝指謂左右曰觀此人舉動豈不異於衆也必爲朕家幹事臣訢聰敏機辯彊記明察初李靈爲文成博士詔崔浩選中書學士器業優者爲助教浩舉其弟子箱子與盧度世李敷三人應之給事高讜子祐尚書段霸兒姪等以爲浩阿黨其親戚言於景穆以浩爲不平聞之於太武太武意在

訢曰云何不取幽州刺史李崇老翁兒浩對曰前亦言
訢合選但以其先行在外故不取之帝曰可待訢還箱
子等罷之遂除中書助教博士入授文成經文成卽位
訢以舊恩親寵遷儀曹尚書領中祕書賜爵扶風公贈
其母孫氏爲容城君帝顧羣臣曰朕始學之歲情未能
專旣總萬機溫習靡暇是故儒道實有闕焉豈惟子咎
抑亦師傅之不勤所以爵賞仍隆蓋不遺舊也訢免冠
拜謝出爲相州刺史爲政清簡百姓稱之訢上疏求於
州郡各立學官使士望之流衣冠之胄就而受業其經
藝通明者上王府書奏獻文從之以訢政爲諸州之最

加賜衣服自是遂有驕矜自得之志受納人財物商胡
珍寶兵人告言尚書李敷與訢少長相好每左右之或
有勸以奏聞敷不許獻文聞訢罪狀檻車徵訢拷劾抵
罪敷兄弟將見疎斥有司諷以中旨嫌敷兄弟之意令
訢告列敷等隱罪可得自全訢深所不欲且弗之知也
乃謂其女壻裴攸曰吾與李敷族世雖遠情如一家在
事既有此勸昨來引簪自刺以帶自絞而不能致絕且
亦不知其事攸曰何爲爲他死敷兄弟事豈可知有馮
闌者先爲敷殺其家切恨之但呼闌弟問之足可知委
訢從其言又趙郡范櫛具列敷兄弟事狀有司以聞敷

坐得罪詔列訴貪冒應死以糾李敷兄弟故免百鞭髡
刑配爲廝役訴之廢也平壽侯張讜見訴與語奇之謂
人曰此佳士也終不久屈未幾而復爲太倉尚書攝南
部事用范櫛陳策計令千里之外戶別轉運詣倉輸之
使所在委滯停延歲月百姓競以貨賂各求在前於是
遠近大爲困弊道路羣議曰畜聚斂之人未若盜臣訴
弟左軍將軍璞謂訴曰范櫛善能降人以色假人以辭
未聞德義之言但有世利之說聽其言也甘察其行也
賊所謂諂諛讒慝貪冒姦佞不早絕之後悔無及訴不
從彌信之腹心事皆以告櫛訴旣寵於獻文參決軍國

大議兼典選舉權傾內外百寮莫不曲節以事之櫟以無功起家拜盧奴令獻文崩訢遷司空進爵范陽公出爲侍中鎮南大將軍開府儀同三司徐州刺史范櫟知文明太后之忿訢又知內外疾之太和元年希旨告訢外叛文明太后徵訢至京師言其叛狀訢曰無之引櫟證訢訢言爾妄云知我吾又何言雖然爾不顧余之厚德而忍爲此不仁甚矣櫟曰公德於櫟何若李敷之德於公公昔忍於敷櫟今敢不忍公乎訢慨然曰吾不用璞言自貽伊戚萬悔於心何嗟及矣遂見誅璞字季直性醇厚多識人物賜爵宜陽侯太常卿

韓延之字顯宗南陽堵陽人魏司徒暨之後也仕晉位建威將軍荊州從事轉平西府錄事參軍晉將劉裕伐司馬休之未至江陵密與延之書招之延之報書辭甚激厲曰劉裕足下海內之人誰不見足下此心而復欲欺誑國士其不屈如此事見南史宋本紀延之以裕父名翹字顯宗於是己字顯宗名子爲翹蓋示不臣劉氏也後奔姚興泰常二年與司馬文思等俱入魏明元以延之爲武牢鎮將賜爵魯陽侯初延之曾來往栢谷塢省魯宗之墓有終焉之志因謂子孫云河洛三代所都朝廷必有居此者我死不勞向北代葬也卽可就此子

從其言遂葬宗之墓次延之後五十餘年而孝文徙都其孫數家卽居於祖墓之北栢谷塢

袁式字季祖陳郡陽夏人漢司徒滂之後父深晉侍中式在南歷武陵王遵諮議參軍及劉裕執權式歸姚興及姚泓滅歸魏爲上客賜爵陽夏子與司徒崔浩一面便盡國士之交時朝儀典章悉出於浩浩以式博於故事每所草創恒顧訪之性長者雖羈旅飄泊而清貧守度不失士節時人甚敬重之皆呼曰袁諮議至延和二年衛大將軍樂安王範爲雍州刺史詔式與中書侍郎高允俱爲從事中郎辭而獲免式沉靖樂道周覽書傳

至於詰訓倉雅偏所留懷作字釋未就以太安二年卒
贈豫州刺史諡肅侯子濟襲父爵位魏郡太守政有清
稱加寧遠將軍及宋王劉昶開府召爲諮議叅軍

毛脩之字敬文滎陽陽武人也世仕晉劉裕之平關中
留子義真鎮長安以脩之爲司馬及義真敗脩之沒統
萬太武平赫連昌獲之使領吳兵以功拜吳兵將軍脩
之能爲南人飲食手自煎調多所適意太武親待之累
遷尚書賜爵南郡公常在太官主進御膳從討和龍時
諸軍攻城行宮人少宋故將朱脩之爲雲中將軍欲率
吳兵爲逆因入和龍冀浮海南歸以告脩之不聽乃止

是日無脩之大變幾作脩之遂奔馮弘脩之又以軍功
遷特進撫軍大將軍位次崔浩下浩以其中國舊門雖
不博洽猶涉獵書傳與其論說之次及陳壽三國志云
有古良史風其所著述文義典正班史以來無及壽者
脩之曰昔在蜀中聞長老言壽曾爲諸葛亮門下書佐
得撻百下故其論武侯云應變非其所長浩乃與論曰
承祚之評亮乃有故義過美之譽非挾恨之言夫亮之
相備英雄奮發之時君臣相得魚水爲喻而不能與曹
氏爭天下委棄荊州退入巴蜀守窮崎嶇之地僭號邊
夷之間此策之下者可以趙他爲偶而以管蕭之亞匹

不亦過乎且亮旣據蜀弗量勢力嚴威切法控勒蜀人欲以邊夷之衆抗衡上國出兵隴右再攻岐山一攻陳倉疎遲失會摧衄而反後入秦川更求野戰魏人知其意以不戰屈之智窮勢盡發病而死由是言之豈合古之善將見可知難乎脩之謂浩言爲然後卒於外都大官諡恭公脩之在南有四子唯子法仁入魏文成初爲金部尚書襲爵轉殿中尚書法仁言聲壯大至於軍旅田狩唱呼處分振於山谷卒贈征東大將軍南郡王諡曰威朱脩之者仕宋爲司徒從事中郎守滑臺爲安頡所禽太武善其固守以宗室女妻之以爲雲中鎮將後

奔馮弘弘送之江南頡之剋滑宋陳留太守嚴稜戍倉垣及山陽公奚斤軍至潁川稜率文武五百人詣斤降明元嘉其誠款賜爵郃陽侯假荊州刺史隨駕南討還爲上客及太武踐阼以歸化之功除中山太守有清廉稱卒於家子幼玉襲稜舊書有傳今附之云脩之在宋顯達事並具南史

唐和字幼起晉西宜安人也父繇以涼土喪亂推涼武昭王霸于河右及涼亡和與兄契攜其甥武昭王孫寶避難伊吾招集人衆二千餘家臣於蠕蠕蠕蠕以契爲伊吾王經二十年和與契遣使降魏爲蠕蠕所逼遂擁

部至高昌蠕蠕遣部帥阿若討和至白力城和先攻高
寧契與阿若戰沒和收餘衆奔前部王國時沮渠安周
屯橫截城和攻拔之斬安周兄子樹又剋高寧白力二
城遣使表狀太武嘉之屢賜之璽書後和與前部王車
伊洛破安周太武使周公萬度歸討焉耆詔和與伊洛
率所領赴度歸喻下柳驢以東六城因共擊波居羅城
拔之後同征龜茲度歸令和鎮焉耆時柳驢戍主乙真
伽將叛和徑入其城禽斬乙真伽由是西域剋平和有
力焉正平元年和詣闕太武優寵之待以爲上客文成
以和歸誠先朝封酒泉公太安中爲濟州刺史甚有稱

績徵爲內都大官評決獄訟不加捶楚察疑獲實者甚多世以是稱之卒贈征西大將軍太常卿酒泉王諡曰宣子欽字孟真位陝州刺史降爵爲侯卒子景宣襲爵卒於東都太守契子玄達性果毅有父風與叔父和歸闕俱爲上客封晉昌公獻文時位華州刺史太和十六年降爲侯子崇字繼祖襲爵

寇讚字奉國上谷人也因難徙馮翊萬年父脩之字延期苻堅東萊太守讚弟謙有道術太武敬重之故追贈脩之安西將軍秦州刺史馮翊公賜命服諡曰哀公詔秦雍二州爲立碑墓又贈脩之母爲馮翊夫人及宗從

追贈太守縣令侯子男者十六人其臨職者七郡五縣
讚少以清潔知名身長八尺姿容嚴凝非禮不動荀堅
僕射韋華州里高達雖年時有異恒以風味相待華爲
馮翊太守召爲功曹後除襄邑令姚泓滅秦雍人千餘
家推讚爲主歸魏拜河南郡太守其後秦雍人來奔河
南滎陽河內者戶至萬數拜讚南雍州刺史軹縣侯於
洛陽立雍之郡縣以撫之由是流人襁負自遠而至參
倍於前進讚爵河南公加安南將軍領南蠻校尉仍刺
史分洛豫二州之僑郡以益之雖位高爵重接待不倦
初讚之未貴嘗從相者唐文相文曰君頷上黑子入幘

位當至方伯封公及其貴也文以百姓禮拜謁曰明公
憶疇昔言乎延文坐曰往時卿言杜瓊不得官長人咸
謂不然及瓊爲蓋屋令卿猶言相中不見而瓊果以暴
疾未拜而終昔魏舒見主人兒死自知已必至公吾恒
以卿言瓊之驗亦復不息此望也乃賜文衣服良馬讚
在州十七年甚收公私之譽年老求致仕卒遺令薄葬
斂以時服太武悼惜之謚曰宣穆子元寶襲爵元寶弟
臻字仙勝年十二遭父憂居喪以孝稱輕財好士獻文
末爲中川太守時馮熙爲洛州刺史政號貪虐仙勝微
能附之甚得其意後爲弘農太守坐受納爲御史所彈

遂廢卒於家子祖訓順陽太守祖訓弟祖禮兄弟並孝

友敦穆白首同居父母亡雖久猶於平生所處堂宇備

設幃帳几杖以時節開堂列拜垂涕陳薦若宗廟焉吉

凶之事必先啓告遠出行反亦如之祖禮宣武末爲河

州刺史在任數年遇郤鐵忽反又爲城人詣都列其貪

狀十六條遇赦免久之兼廷尉卿又兼尚書畏避勢家

承順顏色不能有所執據後蠻反於三鴟爲都督追討

戰歿贈衛大將軍七兵尚書雍州刺史昌平男祖禮弟

儁

儁字祖儁性寬雅幼有識量好學彊記性又廉恕不以

財利爲心家人曾賣物與人而利得絹一匹儁於後知之乃曰得財失行吾所不取訪主還之以選爲孝文帝挽郎除奉朝請大乘賊起燕趙擾亂儁參護軍事東討以功授員外散騎侍郎累遷司空府主簿時靈太后臨朝減食祿官十分之一造永寧佛寺令儁典之資費巨萬主吏不能欺隱寺成又極壯麗靈太后嘉之除左軍將軍孝昌中朝議以國用不足乃置鹽池都將秩比上郡前後居職者多有侵隱乃以儁爲之仍主簿永安初華州人史底與司徒楊椿訟田長史以椿勢貴皆言椿直欲以田給椿儁曰史底窮人楊公橫奪其地若欲損

不足以給有餘見使雷同未敢聞命遂以地還史底孝
莊帝後知之嘉儁守正不撓拜司馬其附椿者咸責焉
二年出爲梁州刺史人俗荒獷多爲盜賊儁乃令郡縣
爲立庠序勸其耕桑敦以禮讓數年之中風俗頓革梁
遣其將曹琰之鎮魏興繼日板築琰之屢擾疆場邊人
患之儁遣長史杜林道攻克其城并禽琰之琰之卽梁
大將景宗之季弟也於是梁人懼焉屬魏室多故州又
僻遠梁人知無外援遂大兵頓魏興志圖攻取儁撫厲
將士人思效命梁人知其得衆心也弗之敢逼儁在州
清苦不事產業其子等並徒步而還吏人送儁留連於

道久之乃得出界大統三年東魏授儁洛州刺史儁因
此乃謀歸闕五年將家及親屬四百口入關拜祕書監
時軍國草創墳典散逸儁始選置令史抄集經史四部
羣書稍得周備加鎮東將軍封安西縣男十七年加散
騎常侍遂稱篤疾不復朝覲恭帝三年賜姓若口引氏
孝閔帝踐阼進爵爲子武成元年進驃騎大將軍開府
儀同三司儁年齒雖高而志識未衰教授子孫必先典
禮明帝尚儒重德特欽賞之數加恩賜思與相見儁不
得已乃入朝常與同席而坐顧訪洛陽故事儁身長八
尺鬚鬢皓然容止端詳音韻清朗帝與之談論不覺屢

爲之前膝及僞辭還帝親執其手曰公年德俱尊朕所
欽尚乞言之事所望於公宜數相見以慰虛想以御輿
令於帝前乘出顧謂左右曰如此事唯積善者可以致
之何止見重於今亦將傳之萬古時人咸以爲榮卒年
八十二武帝歎惜之贈本官加冀定瀛三州諸軍事冀
州刺史諡曰元僞篤於仁義期功之中有孤幼者衣食
豐約并與之同少爲司徒崔光所知先命其子勵與僞
結友僞每造光常清談移日小宗伯盧辨以僞業行俱
崇待以師友之禮每有閑暇輒詣僞讌語彌日恒謂人
曰不見西安君煩憂不遣其爲通人所敬重如此子奉

位至儀同大將軍順陽郡守洵州刺史昌國縣公奉弟
顯少好學最知名居喪哀毀位儀同大將軍掌朝布憲
爲典祀下大夫小納言濩澤郡公

酈範字世則范陽涿鹿人也祖紹慕容寶濮陽太守以
郡迎降道武授兗州監軍父嵩天水太守範太武時給
事東宮太武踐阼追錄先朝舊勲賜爵永寧男以奉禮
郎奉遷太武景穆神主於太廟進爵爲子爲征南大將
軍慕容白曜司馬及定三齊範多進策白曜皆用其謀
遂表爲青州刺史進爵爲侯加冠軍將軍還爲尚書右
丞後除平東將軍青州刺史假范陽公範前解州還京

也夜夢陰毛拂踝他日說之時齊人有占夢者史武進云公豪盛於齊下矣使君臨撫東秦道光海岱必當重牧全齊再祿營丘矣範笑答曰吾將爲卿必驗此夢果如言時鎮將元伊利表範與外賊交通孝文詔範曰鎮將伊利表卿造船市玉與外賊交通規陷卿罪窺覬州任有司推驗虛實自顯有罪者今伏其辜矣卿其明爲算略勿復懷疑還朝卒京師謚曰穆子道元

道元字善長初襲爵永寧侯例降爲伯御史中尉李彪以道元執法清刻自太傅掾引爲書侍御史彪爲僕射李冲所奏道元以屬官坐免景明中爲冀州鎮東府長

史刺史于勁順皇后父也西討關中亦不至州道元行事三年爲政嚴酷吏人畏之姦盜逃于他境後試守魯陽郡道元表立黷序崇勸學教詔曰魯陽本以蠻人不立大學今可聽之以成良守文翁之化道元在郡山蠻伏其威名不敢爲寇延昌中爲東荊州刺史威猛爲政如在冀州蠻人詣闕訟其刻峻請前刺史寇祖禮及以遣戍兵七十人送道元還京二人並坐免官後爲河南尹明帝以沃野懷朔薄骨律武川撫冥柔玄懷荒禦夷諸鎮並改爲州其郡縣戍名令準古城邑詔道元持節兼黃門侍郎馳駟與大都督李崇籌宜置立裁減去留

會諸鎮叛不果而還孝昌初梁遣將揚州刺史元法僧
又於彭城反叛詔道元持節兼侍中攝行臺尚書節度
諸軍依僕射李平故事軍至渦陽敗退道元追討多有
斬獲後除御史中尉道元素有嚴猛之稱權豪始頗憚
之而不能有所糾正聲望更損司州牧汝南王悅嬖近
左右丘念常與臥起及選州官多由於念念常匿悅第
時還其家道元密訪知收念付獄悅啓靈太后請全念
身有敕赦之道元遂盡其命因以劾悅時雍州刺史蕭
寶夤反狀稍露侍中城陽王徽素忌道元因諷朝廷遣
爲關右大使寶夤慮道元圖己遣其行臺郎中郭子帙

圍道元於陰盤驛亭亭在岡上嘗食岡下之井旣被圍穿井十餘丈不得水水盡力屈賊遂踰墻而入道元與

其弟道

闕

二子俱被害道元瞋目叱賊厲聲而死寶賁

猶遣斂其父子殯於長安城東事平喪還贈吏部尚書冀州刺史安定縣男道元好學歷覽奇書撰注水經四十卷本志十三篇又爲七聘及諸文皆行於世然兄弟不能篤睦又多嫌忌時論薄之子孝友襲道元第四弟道慎字善季涉歷史傳有幹局位正平太守有能名遷長樂相卒贈平州刺史道慎弟道約字善禮樸質遲鈍頗愛琴書性多造請好以榮利干謁乞丐不已多爲人

所笑弄坎壈於世不免飢寒晚歷東萊魯陽二郡太守
爲政清靜吏人安之範弟道峻子憚字幼和好學有文
才尤長吏幹舉秀才射策高第歷位尚書外兵郎行臺
長孫承業引爲行臺郎憚頗兼武用恒以功各自許每
進計於承業多見納用以功賞魏昌縣子憚在軍啓求
減身官爵爲父請贈詔授征虜將軍安州刺史憚後與
唐州刺史崔元珍固守平陽尒朱榮稱兵赴闕憚與元
珍不受爲榮行臺郎中樊子鵠陷城被害所作文章頗
行於世撰慕容氏書不成子懷則司空長流參軍

韓秀字白武昌黎人也祖宰慕容儁謁者僕射父景皇

始初歸魏拜宣威將軍騎都尉秀歷位尚書郎賜爵遂
昌子文成稱秀聰敏清辯才任喉舌遂命出納王言并
掌機密行幸遊獵隨侍左右獻文卽位轉給事中參征
南慕容白曜軍事延興中尚書奏以敦煌一鎮介遠西
北寇賊路衝慮或不固欲移就涼州羣臣會議僉以爲
然秀獨曰此蹙國之事非關土之宜愚謂敦煌之立其
來已久雖隣疆寇而兵人素習循常置戍足以自全若
徙就姑臧慮人懷異意或貪留重遷情不願徙脫引寇
內侵深爲國患且捨遠就近遙防有關一旦廢罷是啓
戎心則夷狄交構互相來往關右荒擾烽警不息邊役

北史卷之二十一 列傳
煩興艱難方甚乃從秀議後爲平東將軍青州刺史卒
子務襲爵務字道世性端謹有吏幹爲定州平北長史
頗有受納爲御史中尉李平所劾付廷尉會赦免後除
龍驤將軍郢州刺史務獻七寶牀象牙席詔曰昔晉武
帝焚雉頭裘朕常嘉之今務所獻亦此之流也奇麗之
物有乖風素可付其家人後以詐表破賊免官久之拜
太中大夫進號左將軍卒

堯暄字辟邪上黨長子人也本名鍾葵後賜名暄祖僧
賴道武平中山與趙郡呂含首來歸國暄聰了美容貌
爲千人軍將太武以其恭謹擢爲中散後兼北部尚書

于時始立三長暄爲東道十三州使更比戶籍賜獨車
一乘廐馬四匹暄前後從征及出使檢案三十許度皆
有剋已奉公之稱賞賜衣服綵絹奴婢等物賜爵平陽
伯及改置百官授太僕卿轉大司農卒於平城孝文爲
之舉哀贈相州刺史初暄至徐州見州城樓觀嫌其華
盛乃令往往毀徹由是後更損落及孝文幸彭城聞之
曰暄猶可追斬暄長子洪襲爵洪子傑字永壽元象中
開府儀同三司樂城縣公洪弟遵位臨洮太守卒諡曰
思遵弟榮位員外散騎侍郎

子雄字休武少驍果輕財重氣位燕州刺史平城縣伯

隨介朱兆與齊神武戰敗於廣阿率所部據定州歸神武其從兄傑爲兆滄州刺史亦遣使降神武以其兄弟俱有誠款使傑便爲行瀛州事使雄代傑爲瀛州刺史進爵爲公時禁網疎濶官司相與聚斂唯雄義然後取接下以恩甚爲吏人所懷魏孝武帝入關雄爲大都督隨高昂破賀拔勝於穰城仍除豫州刺史元洪威據潁川叛叛人趙繼宗殺潁川太守邵招據樂口北應洪威雄討之繼宗敗走城內因雄之出據州引西魏雄復與行臺侯景討平之梁將李洪芝王當伯襲破平鄉城雄並禽之又破梁司州刺史陳慶之復圍南荊州東救未

寶爲揚州刺史據項城義州刺史韓顯據南頓雄一日
拔其二城禽顯及長史岳寶遁走加驃騎大將軍儀同
三司仍隨侯景平魯陽復除豫州刺史雄雖武將性質
寬厚爲政舉其大綱而已在邊十年屢有功績愛人物
多所施與亦以此稱興和四年卒於鄴贈司徒諡曰武
恭子師嗣

柳崇字僧生河東解人也七世祖軌晉廷尉卿崇方雅
有器量身長八尺美鬚明目兼有學行舉秀才射策高
第解褐太尉主簿轉尚書右外兵郎中于時河東河北
二郡爭境其間有鹽池之饒虞坂之便守宰百姓皆恐

外割公私朋競紛囂臺府孝文乃遣崇檢斷上下息訟
屬荆郢新附南寇窺擾又詔崇持節與州郡經略加慰
喻還遷太子洗馬本郡中正累遷河中太守崇初屆郡
郡人張明失馬疑執十餘人崇見之不問賊事人別借
以溫顏更問其親老存不農業多少而微察其辭色卽
獲真賊呂穆等二人餘皆放遣郡中畏服境內恬然卒
於官贈岐州刺史諡曰穆崇所製文章寇亂遺失長子
慶和性沉靜不競於時位給事中本郡中正卒慶和弟
楷字士則身長八尺善草書頗涉文史位撫軍司馬

論曰屈遵學藝知機恒乃局量受委張蒲谷渾文武爲

用人世仍顯不亦善乎公孫表初則一介見知終以輕薄致戾軌始受探金之賞末陷財利之嫌鮮克有終固不虛也張濟使於四方有延譽之美李先學術嘉謀荷遇三世賈彝早播時譽秀則不畏疆禦寶瑾李訢時曰良幹瑾以片言疑似訢以夙故猜嫌而嬰合門之戮良可悲也韓延之忠於所事有國士之烈袁式取遇崔公以博雅而重修之晚著誠欵唐和萬里慕義寇讚誠信見嘉酈範智器而達道元遭命有銜鬚之風韓秀議邊得馭遠之策堯暄聰察致位禮加存沒柳崇素業有資器行仍世盛矣乎

北史卷二十七

北史卷二十七考證

屈遵傳屈遵字子度○度魏書作皮

公孫表傳車駕次汲郡○駕監本誤騎今改從南本
生子叡字叔文○叔文魏書作文叔

李先傳李先字容仁○魏書先本字宏仁以犯高祖諱
故改容此則不必諱而改之矣

父懋石季龍樂安太守○懋魏書作樊

子國襲爵○國魏書作罔

馮翊公源懷弟得其玉琢爲器佩○弟魏書作等
時人稱其爲播郎○播監本訛潘今從南本

賈彝傳在重山人不知學○一本山字下有中字

景儁弟景輿○輿一本作興

李訢傳此子之生相者言貴吾每觀或未可知○一本
觀字下有察字

足可知委○一本委字下有曲字


用范櫛陳策計○一本作用范櫛陳端等計

寇讚傳讚弟謙有道術○謙魏書作謙字

爲立碑墓○碑字下一本有於字

酈道元傳馳驛與大都督李崇籌宜置立裁減去留○

監本置訛等去訛法今俱改從魏書



北史卷二十七考證

北史卷二十八

唐 李 延 壽 撰

列傳第十六

陸侯

源賀

曾孫彪
師從叔雄

立孫師

劉尼 薛提

陸侯代人也曾祖幹祖引世領部落父突道武初帥部人從征伐數有戰功位離石鎮將上黨太守關內侯侯少聰慧明元踐阼襲爵關內侯位給事典選部蘭臺事當官無所撓太武征赫連昌詔侯督諸軍鎮以備蠕蠕與西平安頡攻剋武牢賜爵建鄴公拜冀州刺史

時考州郡唯俟與河內太守丘陳爲天下第一轉武牢
鎮大將平涼休屠金崖羌狄子玉等叛復轉爲安定鎮
大將追討崖等皆獲之遷懷荒鎮大將未期諸高車莫
弗訖懼俟嚴急請前鎮將郎孤太武許之徵俟至京朝
見言不過周年孤身必敗高車必叛帝疑不實切責之
以公歸第明年諸莫弗果殺孤以叛帝聞之大驚召俟
問其故俟曰夫高車之俗上下無禮無禮之人難爲其
上臣莅以威嚴節之憲網欲漸加訓導使知分限而惡
直醜正實繁有徒故訟臣無恩稱孤之美孤獲還鎮欣
其名譽必加恩於百姓譏臣爲失專欲以寬惠臨之仁

恕待之無禮之人易生陵傲不過期年無復上下旣無
上下然後收之以威則人懷怨慙慙旣多敗亂彰矣
帝歎曰卿身乃短慮何長也卽日復除散騎常侍帝征
蠕蠕破涼州常隨駕別督輜重又與高涼王邠復渡河
南略地仍遷長安鎮大將與高涼王邠擊蓋吳於杏城
獲吳二叔諸將欲送京師侯獨不許曰若不斬吳恐長
安之變未已一身藏竄非其親信誰能獲之若停十萬
衆追一人非上策也不如私許吳叔免其妻子使自追
吳諸將咸曰今獲其二叔唯吳一人何所復至侯曰諸
君不見毒虵乎不斷其頭猶能爲害況除腹心之疾而

曰必遺其類可乎遂捨吳二叔與之期及期吳叔不至諸將皆咎俟俟曰此未得其便耳必不肯也後數日果斬吳以至皆如其言俟之明略獨決皆此類也遷內都大官安定盧水劉超等叛太武以俟威恩被關中詔以本官加都督秦雍諸軍鎮長安帝曰超等恃險不順王命朕若以重兵與卿則超等必合爲一若以輕兵與卿則不制矣今使卿以方略定之於是俟單馬之鎮旣至申以威信示以成敗超猶無降意俟乃率其帳下見超超使人逆曰三百人以外當以弓馬相待三百人以內當以酒食相供乃將二百騎詣超超備甚嚴遂縱酒盡

醉而還後僞獵詣超與士卒約曰今會發機當以醉爲
限俟乃詐醉上馬大呼斬超首士卒應聲縱擊遂平之
帝大悅徵拜外都大官文成踐阼以子麗有定策勲進
爵東平王薨年六十七諡成王有子十二人長子馘多
智有父風文成見而悅之謂朝臣曰吾常歎其父智過
其軀是復踰於父矣少爲內都下大夫奉上接下行止
取與每能逆曉人意與其從事者無不愛之興安初賜
爵聊城侯出爲相州刺史假長廣公爲政清平抑彊扶
弱州中有德宿老名望素重者以友禮待之詢之政事
責以方略如此者十人號曰十善又簡取諸縣彊門百

餘人以爲假子誘接殷勤賜以衣服令各歸家爲耳目於是發姦擿伏事無不驗百姓以爲神明無敢劫盜者在州七年家至貧約徵爲散騎常侍百姓乞留馘者千餘人獻文不許謂羣臣曰馘之善政雖古人何以加之賜絹五百匹奴婢十口馘之代還也吏人大斂布帛以遺之馘皆不受人亦不取於是以此物起佛寺焉因名長廣公寺後襲父改封建安王時宋司州刺史常珍奇以懸瓠內附新人猶懷去就馘銜旨撫慰諸有陷軍爲奴婢者馘皆免之百姓欣悅人情乃定車駕討蠕蠕詔馘爲選部尚書錄留臺事及獻文將禪位於京兆王子

推任城王雲隴西王源賀並固諫馭抗言曰皇太子聖德承基四海瞻望不可橫議干國之紀臣請勿頸殿庭有死無貳久之帝乃解詔曰馭直臣也其能保吾子乎遂以馭爲太保與太尉源賀持節奉皇帝璽紱傳位于孝文延興四年薨贈以本官諡曰貞王馭有六子琇凱知名琇字伯琳馭第五子也母赫連氏身長七尺九寸甚有婦德馭有以爵傳琇之意琇年九歲馭謂之曰汝祖東平王有十二子我爲嫡長承襲家業今已年老屬汝幼沖詎堪爲陸氏宗首乎琇對曰苟非鬪力何患童幼馭奇之遂立琇爲世子馭薨襲爵琇沉毅少言雅好

讀書以功臣子孫爲侍御長累遷祠部尚書司州大中
正會從兄叡事免官景明初試守河內郡咸陽王禧謀
反令子曇和等先據河內琇聞禧反斬曇和首時以琇
不先送曇和禧敗始斬責其通情徵詣廷尉少卿崔振
窮罪狀案琇大逆陸宗大小咸見收捕會將赦先斃於
獄琇弟凱仍上書訴寃宣武詔復琇爵子景祚襲凱字
智君謹重好學位太子庶子給事黃門侍郎凱在樞要
十餘年以忠厚見稱後遇患頻上書乞骸骨除正平太
守在郡七年號爲良吏初孝文將議革變舊風大臣並
有難色又每引劉芳郭祚等常與規謀共論政事而國

戚謂遂疎已怏怏有不平之色帝乃令凱私喻之曰至尊但欲廣知前事直當問其古式耳終無寵彼而疎國戚舊人意乃稍解及兄琇陷罪凱亦被收遇赦乃免凱痛兄之死哭無時節目幾失明訴冤不已至正始初宣武復琇官爵凱大喜置酒集諸親曰吾所以數年之中抱病忍死者顧門計耳今願已遂以其年卒贈龍驤將軍南青州刺史諡曰惠長子暉字道暉與弟恭之並有時譽洛陽令賈禎見其兄弟歎曰僕以老年更覩雙璧又嘗兄弟共候黃門郎孫惠蔚謂諸賓曰不意二陸復在坐隅吾德謝張公無以延譽暉位尚書右戶三公郎

坐事免後除伏波將軍卒贈冠軍恒州刺史曄擬急就
篇爲悟蒙章及七誘十醉章表數十篇曄與恭之晚不
和睦爲時所鄙子元規位尚書郎元規子撥陰陽律曆
多所通解位并州長流叅軍恭之字季順有操尚位東
荊州刺史贈吏部尚書諡曰懿恭之所著文章詩賦凡
千餘篇子暉字仁崇篤志文學齊律序則仁崇之詞位
終通直散騎常侍弟寬字仁惠太子中舍人待詔文林
館寬兄弟並有才品議者稱爲三武馭弟歸位東宮舍
人駕部校尉子珍夏州刺史贈太僕卿諡曰靜珍子旭
性雅淡好易緯候之學撰五星要決及兩儀真圖頗得

其指要太和中徵拜中書博士稍遷散騎常侍知天下
將亂遂隱於太行山屢徵不起卒後贈并汾恒肆四州
刺史子騰

騰字顯聖少慷慨有大節從尔朱榮平葛榮以功賜爵
清河縣伯稍遷通直散騎常侍及孝武西遷時使青州
遂留鄴爲陽城郡守大統九年大軍東討陽城被執周
文帝釋而與語騰盛論東州人物又叙述時事辭理抑
揚周文嘆曰卿真不肯本也卽拜帳內大都督未幾除
太子庶子遷武衛將軍騰旣爲周文所知思欲立功不
願內職及安康賊黃衆寶等作亂攻圍東梁州城中糧

盡詔騰率軍大破之軍還拜龍州刺史使通江由路直
出南秦周文謂曰此是卿取柱國之日卽解所服金帶
賜之州人李廣嗣李武等憑據巖險歷政不能制騰密
令多造飛梯夜襲破之執廣嗣等於鼓下其黨有任公
忻圍逼州城請免廣嗣及武卽散兵請罪騰謂將士曰
吾不殺廣嗣等可謂墮軍實而長寇讎卽斬廣嗣及武
以首示之於是出兵奮擊盡獲之進位驃騎大將軍開
府儀同三司轉江州刺史進爵上庸縣公陵州木籠獠
恃險每行抄劫詔騰討之獠因山爲城攻之未可拔騰
遂於城下多設聲樂及諸雜伎示無戰心諸賊果棄其

兵仗或攜妻子臨城觀樂騰知其無備遂縱兵討擊盡
殺破之周明帝初陵眉等八州夷夏並反攻破郡縣騰
率兵討平之及齊公憲作鎮於蜀以騰爲隆州刺史令
憲入蜀兵馬鎮防皆委騰統攝趙公招代憲復請留之
遷隆州總管領刺史保定二年資州石槃人反殺郡守
據險自守州軍不能制騰率軍討擊盡破斬之而蠻子
反所在蠶起山路險阻難得掩襲遂量山川形勢隨便
開道蠻獠畏威承風請服所開之路多得古銘並是諸
葛亮桓溫舊道是年鐵山獠抄斷內江路使驛不通騰
乃進軍討之一日下其三城招納降附者三萬戶帝以

騰母在齊未令東討適有其親屬自齊還朝者晉公護
奏令告騰云齊已誅公母兄蓋欲發其怒也騰乃發哀
泣血志在復讎四年齊公憲與晉公護東征請騰爲副
趙公招時在蜀復欲留之晉公護與招書於是令騰馳
傳還朝副憲東伐天和初信州蠻蠻據江碛反叛連結
二千餘里又詔騰討之騰沿江南而下軍至湯口分道
奮擊所向摧破乃築京觀以旌武功涪陵郡守蘭休祖
又阻兵爲亂方二千餘里復詔騰討之巴蜀悉定詔令
樹碑紀功績焉騰自在龍州至是前後破平諸賊凡賞
得奴婢八百口馬牛稱是四年遷江陵總管陳遣其將

章昭達圍江陵衛王直闈有陳寇遣大將軍趙閻李遷
哲等率步騎赴之並受騰節度時遷哲等守外城陳將
程文季雷道勤夜來掩襲遷哲等驚亂不能抗禦騰夜
遣開門奮擊大破之陳人奔潰道勤中流矢而斃陳人
決龍川寧朔堤引水灌江陵城騰親率將士戰於西堤
破之陳人乃遁加位柱國進爵上庸郡公建德二年徵
拜大司空尋出爲涇州總管宣政元年冬薨於京師贈
太尉公諡曰定子玄嗣玄字士鑒入關時年七歲仕齊
爲奉朝請成平縣令齊平武帝見玄特加勞勉卽拜地
官府都上士大象末爲隋文帝相府內兵參軍玄弟融

字士傾最知名少歷顯職大象末位至大將軍定陵縣公弟麗少以忠謹入侍左右太武特親昵之舉動審慎初無憊失賜爵章安子稍遷南部尚書太武崩南安王余立旣而爲常侍宗愛等所殺百寮憂惶莫知所立麗首建大議與殿中尚書長孫渴侯尚書源賀羽林中郎劉尼奉迎文成於苑中而立之社稷獲安麗之謀也由是受心膂之任在朝者無出其右與安初封平原王麗頻讓不聽乃啓以讓父文成曰朕爲天下主豈不能得一二王封卿父子也以其父侯爲東平王麗尋遷侍中撫寧大將軍司徒公復其子孫賜妻妃號麗以優寵旣頻

固辭不受帝益重之領太子太傅麗好學愛士常以講習爲業甚孝遭父憂毀瘠過禮和平六年文成崩先是麗療疾於代郡溫泉聞凶欲赴左右止之曰宮車晏駕王德望素重姦臣若疾人譽慮有不測之禍麗曰安有聞君父之喪方慮禍難便馳赴初乙弗渾悖傲每爲不法麗數諍之由是見忌害之謚曰簡王陪葬金陵孝文追錄先朝功臣以麗配饗廟庭麗二妻長曰杜氏次張氏長子定國杜氏所生次叡張氏所出定國在襁抱文成幸其第詔養宮內至於游止常與獻文同處年六歲爲中庶子及獻文踐阼拜散騎常侍賜封東郡王定國

以承父爵辭不許又以父爵讓弟叡乃聽之俄遷侍中儀曹尚書轉殿中尚書前後大駕征巡擢爲行臺錄都曹事超遷司空定國恃恩不循法度延興五年坐事免官爵爲兵太和初復除侍中鎮南將軍秦益二州刺史復王爵八年薨於州贈以本官諡曰莊王

子昕之字慶始風望端雅襲爵例降爲公尚獻文女常山公主拜駙馬都尉歷通直郎景明中以從叔琇罪免官尋以主壻除通直散騎常侍歷兗青二州刺史並有政績轉安北將軍相州刺史卒贈鎮東將軍冀州刺史諡曰惠初定國娶河東柳氏生子安保後娶范陽盧度

世女生昕之二室俱爲舊族而嫡妾不分定國亡後兩子爭襲父爵僕射李冲有寵於時與度世子伯源婚親相好冲遂左右助之昕之由是承爵尚主職位赫奕安保沉廢貧賤不免飢寒昕之容貌柔謹孝文以其主壻特垂昵眷宣武時年未四十頻撫三藩當世以此榮之昕之卒後母盧悼念傷過而亡公主奉姑有孝稱神龜初與穆氏琅邪長公主並爲女侍中又性不妬忌以昕之無子爲納妾媵而皆育女公主有三女無男以昕之從兄希道第四子子彰爲後子彰字明遠本名士沉年十六出後事公主盡禮丞相高陽王雍常言曰常山妹

雖無男以子彰爲兒乃過自生矣正光初襲爵東郡公累遷給事黃門侍郎子彰妻卽咸陽王禧女禧誅養於彭城王第莊帝親之略同諸姊建義初尅朱榮欲循舊事庶姓封王由是封子彰濮陽郡王尋而詔罷仍復先爵天平中拜衛將軍潁州刺史以母憂去職元象中以本將軍除齊州刺史又加驃騎將軍行懷州事轉北豫州刺史仍除徐州刺史將軍並如故一年歷三州當世榮之還朝除衛大將軍右光祿大夫行瀛州事尋拜侍中復行滄州事進號驃騎大將軍行冀州事除侍讀兼七兵尚書行青州事子彰初爲州以聚斂爲事晚節脩

改自行青冀滄瀛甚有時譽加以虛已納物人士敬愛
之除中書監卒贈開府儀同三司諡日文宣子彰崇好
道術曾嬰重病藥中須桑螵蛸子彰不忍害物遂不服
焉其仁如此教訓六子雅有法度子印

印字雲駒少機悟美風神好學不倦博覽羣書五經多
通大義善屬文甚爲河間邢邵所賞邵又與子彰交游
嘗謂子彰曰吾以卿老蚌遂出明珠意欲爲羣拜紀可
乎由是名譽日高雅爲搢紳所推許起家員外散騎侍
郎歷文襄大將軍主簿中書舍人兼中書侍郎以本職
兼太子洗馬自梁魏通和歲有交聘印每兼官讌接在

席賦詩卽必先成雖未能盡工以敏速見美除中書侍郎修國史以父憂去職居喪盡禮哀毀骨立詔以本官起文襄時鎮鄴嘉其至行親詣門以慰勉之卽母魏上庸公主初封藍田高明婦人也甚有志操卽昆季六人並主所出故邢邵常謂人云藍田生玉固不虛矣主教訓諸子皆以義方雖創巨痛深出於天性然動依禮度亦母氏之訓焉卽兄弟相率廬於墓側負土成墳朝廷所嗟尚發詔褒揚改其所居里爲孝居里服竟當襲不忍嗣侯使迄未應受齊天保初常山王薦卽器幹文宣面授給事黃門侍郎遷吏部郎中上洛王思宗爲清都

尹辟爲邑中正食貝丘縣幹遭母喪哀慕毀悴殆不勝
喪遂至沉篤頓伏牀枕又成風疾第五弟搏遇疾臨終
謂其兄弟曰大兄疴病如此性至慈愛搏之死日必不
得使大兄知之哭泣聲必不可聞徹致有感動家人至
於祖載方始告之叩聞而悲痛一慟便絕年四十八叩
自在朝行篤慎周密不說人短不伐己長言論清遠有
人倫鑒裁朝野甚悲惜之贈衛將軍青州刺史諡曰文
所著文章十四卷行於世齊之郊廟諸歌多叩所制子
又字曰襲爵始平侯又聰敏博學有文才年十九舉司
州秀才歷祕書郎南陽王文學通直散騎侍郎待詔文

林館兼散騎侍郎迎陳使還兼中書舍人加通直散騎
常侍又於五經最精熟館中謂之石經人謂之語曰五
經無對有陸又印第二弟駿字雲驤自中書舍人歷黃
門侍郎散騎常侍卒於東廣州刺史駿弟杳字雲邁亦
歷中書舍人黃門常侍假儀同三司秦州刺史武平中
爲寇所圍經百餘日就加開府儀同三司城中多疫癘
死者過半人無異心遇疾卒及城陷陳將吳明徹以杳
有善政吏人所懷啓陳主還其屍家累貲物無所犯贈
開府儀同三司尚書僕射子玄卿位尚書膳部郎杳弟
騫字雲儀亦歷中書舍人黃門常侍武平末吏部郎中

騫弟搏字雲征好學有行檢卒於著作佐郎搏弟彥師
字雲房少以行檢稱及長好學解屬文魏襄城王元旭
引爲參軍事以父艱去職哀毀殆不勝喪與兄卬廬於
墓次鄉人重之皆就墓側存問晦朔之際車馬不絕中
書令河間邢邵表薦之未報彭城王浹爲司州牧召補
主簿後歷中外府東閣祭酒兄卬當襲父始平侯以彥
師昆弟中最幼表讓封焉彥師固辭而止世稱友悌孝
義總萃一門爲中書舍人通直散騎侍郎每陳使至必
高選主客彥師所接對者前後六輩歷中書黃門侍郎
後以不阿宦者遇讒出爲中山太守有惠政數年徵爲

吏部郎中散騎常侍又拜銀青光祿大夫假儀同三司
行鄭州刺史尋除給事黃門侍郎武平末車駕如晉陽
北平王鎮鄴彥師留臺機密以重慎見知周武帝平齊
授彥師下大夫轉少納言賜爵臨水縣男及隋文爲丞
相彥師遇疾請假還鄴尉遲迥將爲亂彥師知之遂將
妻子潛歸長安文帝嘉之授內史下大夫拜上儀同及
帝授禪拜尚書左丞進爵爲子彥師素多病未幾以務
劇病動乞解所職有詔聽以本官就第歲餘轉吏部侍
郎隋承周制官無清濁彥師在職凡所任人頗甄別於
士庶論者美之後復以病出爲汾州刺史卒官

叡字思弼年十餘襲爵撫軍大將軍平原王沉雅好學折節下士年未二十時人便以宰輔許之娶東徐州刺史博陵崔鑿女時孝文尚未改北人姓鑿謂所親云平原王才度不惡但恨其姓名殊爲重複叡婚自東徐還經鄴見李彪甚敬悅之仍與趣京以爲館客後爲北征都督擊蠕蠕大破之遷侍中都曹尚書時蠕蠕又犯塞詔叡討之追至石磧禽其帥赤阿突等數百人還加散騎常侍遷尚書左僕射領北部尚書十六年降五等之爵以麗勲著前朝封叡鉅鹿郡公尋爲使持節鎮北大將軍尚書令衛將軍討蠕蠕大破之而還以母憂解孝

文將有南伐之事以本官起授征南將軍叡固辭請終情禮敕有司敦喻不許復除使持節都督恒州刺史行尚書令時車駕南征上表諫帝不從叡又表請車駕還代親臨大師馮熙葬坐削奪都督三州諸軍事尋進號征北大將軍以有順遷之表加邑四百戶時穆泰爲定州刺史以疾病請恒州自効乃以叡爲定州刺史未發遂與泰等同謀構逆賜死獄中聽免孥戮徙其妻子於遼西叡長子希道字洪度有風貌美鬚髯歷覽經史頗有文致初拜中散遷通直郎坐父事徙於遼西於後得還從征自效以軍功賜爵淮陽男拜諫議大夫累遷前

將軍郢州刺史希道善於馭邊甚有威略轉平西將軍涇州刺史卒官贈撫軍將軍定州刺史希道有六子士懋字元偉天平中以其曾祖麗有翼戴之勲詔特復鉅鹿郡公令士懋襲位營州刺史士懋弟士宗字仲彥尚書左外兵郎中士宗弟士述字幼文符璽郎中建義初並於河陰遇害士述弟士沉出繼叔昕之士沉弟士廉字季脩建州平北府長史永安末余朱世隆攻陷州城見害士廉弟士佩字季偉武定中安東將軍司州從事希道弟希悅尚書外兵郎中麗季弟騏驎侍御中散轉侍御史太和初新平太守子高貴孝昌中兗州鎮東府

法曹參軍高貴子操字仲志高簡有風格早以學業知名雅好文操仕魏兼散騎常侍聘梁使還爲廷尉卿齊文襄爲世子甚好色崔季舒爲掌媒焉薛氏寘書妻元氏有色迎入欲通之元氏正辭且哭世子使季舒送付廷尉罪之操曰廷尉守天子法須知罪狀世子怒召操命刀環築之更令科罪操終不撓乃口責之後徙御史中丞天保中卒於殿中尚書子孔璋武平中卒於高陽太守高貴弟孟遠位奉朝請孟遠子槩之位司農卿槩之子爽字開明少聰敏年九歲就學日誦二千餘言齊尚書僕射楊遵彥見而異之曰陸氏世有人焉仕齊位

中書侍郎齊滅周武帝聞其各與陽休之袁叔德等俱徵入關諸人多將輜重爽獨載數千卷書至長安授宣納上士隋文帝受禪頻遷太子洗馬與左庶子宇文愷等撰東宮典記七十卷朝廷以其博學有口辯陳人至境常令迎勞卒官贈上儀同宣州刺史子法言敏學有家風釋褐承奉郎初爽之爲洗馬常奏文帝云皇太子諸子未有嘉名請依春秋之義更立名字上從之及太子廢上追怒爽曰我孫製名寧不自解陸爽乃爾多事扇惑於勇亦由此人其身雖故子孫並宜屏黜終身不齒法言竟坐除名

源賀西平樂都人私署河西王禿髮儁檀之子也儁檀
爲乞伏熾盤所滅賀自樂都奔魏賀偉容貌善風儀太
武素聞其名及見器其機辯賜爵西平侯謂曰卿與朕
同源因事分姓今可爲源氏從擊叛胡白龍又討吐京
胡皆先登陷陣以功進號平西將軍大武征涼州以爲
鄉導問攻戰之計賀曰姑臧外有四部鮮卑各爲之援
然皆臣祖父舊人臣願軍前宣國威信必相率請降外
援旣服然後攻其孤城拔之如反掌耳帝曰善乃遣賀
招慰下三萬餘落及圍姑臧由是無外慮故得專力攻
之涼州平以功進爵西平公又從征蠕蠕擊五城吐京

胡討蓋吳諸賊皆有功拜散騎常侍從駕臨江爲前鋒
大將善撫士卒加有料敵制勝之謀賀爲人雄果每遇
強寇輒自奮擊帝深誠之賀本名破羌是役也帝謂曰
人之立名宜保其實何可濫也賜名賀焉拜殿中尚書
南安王余爲宗愛所殺賀部勒禁兵靜邊外內與南部
尚書陸麗決議定策翼戴文成令麗與劉尼馳詣苑中
奉迎賀營中爲內應俄而麗抱文成單騎而至及卽位
賀有力焉以定策勲進爵西平王及班賜百僚敕賀任
意取之辭以江南未賓漢北不款府庫不宜致匱固使
取之唯取戎馬一疋時斷獄多濫賀上書曰案律謀反

之家其子孫雖養他族追還就戮所以絕罪人之類彰大逆之辜其爲劫賊應誅者兄弟子姪在遠道隔關津皆不坐竊惟先朝制律之意以不同謀非絕類之罪故特垂不死之詔若年十三已下家人首惡計所不及臣愚以爲可原其命没入官帝納之出爲冀州刺史改封隴西王旣受除上書曰臣聞人之所寶莫寶於生命德之厚者莫厚於宥死然犯死之罪難以盡恕權其輕重有可矜恤今勅寇游魂於北狡賊負嶮於南其在壇場猶須戍防臣愚以爲自非大逆赤手殺人之罪其坐賊及盜與過誤之愆應入死者皆可原命謫守邊境是則

已斷之體更受生成之恩徭役之家漸蒙休息之惠刑措之化庶幾在茲帝嘉納之已後入死者皆恕死徙邊久之帝謂羣臣曰昔源賀勸朕宥諸死刑徙充北藩諸戍自爾至今一歲所活殊爲不少濟命之理旣多邊戍之兵有益苟人人如賀朕臨天下復何憂哉羣臣咸曰非忠臣不能進此計非聖明不能納此言賀之臨州鞠獄以情徭役簡省清約寬裕甚得人心時武邑郡姦人石華告沙門道可與賀謀反有司以聞文成曰賀保無此乃精加訊檢華果引誣乃遣使慰勉之帝顧左右曰賀忠誠尚致誣謗其不若是者可無愼乎時考殿最賀

政爲上第賜衣馬器物班宣天下後徵拜太尉蠕蠕寇邊賀從駕討破之及獻文將傳位于京兆王子推時賀都督諸軍事屯漠南乃馳傳徵賀賀至正色固執不可卽詔持節奉皇帝璽綬以授孝文是歲河西叛敕遣賀討之多所降破賀依古今兵法及先儒耆舊說略採至要爲十二陳圖上之獻文覽而嘉焉又都督三道諸軍屯漠南時每歲秋冬遣軍三道並出以備北寇至春中乃班歸賀以勞役京都又非禦邊長計乃上言請募諸州鎮有武勇者三萬人復其徭賦厚加振恤分爲三部二鎮之間築城城置萬人給強弩十二牀武衛三百乘

弩一牀給牛六頭武衛一乘給牛二頭多造馬槍及諸器械使武略大將二人以鎮撫之冬則講武春則種植並成並耕則兵未勞而有盈蓄矣又於白道南三處立倉運近州鎮租粟以充之足食足兵以備不虞於事爲便不可歲常舉衆事寢不報上書稱病乞骸骨至于再三乃許之朝有大議皆就詢訪又給衣藥珍羞太和元年二月療疾於溫湯孝文文明太后遣使屢問消息太醫視疾患篤還于京師乃遺令諸子曰吾頃以老患辭事不悟天慈降恩爵逮於汝汝其母傲恠母荒怠母奢越母嫉妬疑思問言思審行思恭服思度遏惡揚善親

賢遠佞目觀必真耳屬必正忠勤以事君清約以臨己
吾終之後所葬時服單襚足申孝心芻靈明器一無用
也三年薨贈侍中太尉隴西王印綬諡曰宣王賜輜輶
車及命服溫明祕器陪葬金陵長子延性謹厚少好學
位侍御中散賜爵廣武子卒贈涼州刺史廣武侯諡曰
簡子麟襲延弟思禮後賜名懷謙恭寬雅有大度文成
末爲侍御中散父賀辭老詔受父爵後持節督諸屯於
漠南蠕蠕甚憚之還除殿中尚書出爲長安鎮將雍州
刺史清儉有惠政善撫恤劫盜息止復拜殿中尚書加
侍中參都曹事又督諸軍征蠕蠕六道大將咸受節度

遷尚書令參議律令後例降爲公除司州刺史又從駕南征加衛大將軍領中軍事以母憂去職賜帛三百匹穀一千石車駕幸代詔使者弔慰景明二年除尚書左僕射加位特進時詔以姦吏犯罪每多逃遁肆青乃出並皆釋然自今犯罪不問輕重藏竄者悉皆遠流若永避不出兄弟代徙懷乃奏曰謹案條制逃吏不在赦限竊惟聖朝之恩事異前宥諸流徙在路尚蒙旋返況有未發而仍遣邊戍案守宰犯罪逃走者衆祿潤旣優尚有茲失及蒙恩宥卒然得還今獨苦此等恐非均一之法書奏門下以成式旣班駁奏不許懷重奏曰臣以爲

法貴經通政尚簡要刑憲之設所以網羅罪人苟理之
所備不在繁典伏尋條例制勲品以下罪發逃亡遇恩
不宥雖欲抑絕姦途匪爲通式謹按事條侵官敗法專
據流外豈九品已上人皆貞白也其諸州守宰職任清
流至有貪濁事發逃竄而遇恩免罪勲品已下獨求斯
例如此則寬縱上流法切於下育物有差惠罰不等又
謀逆滔天經恩尚免吏犯微罪獨不蒙赦使大宥之經
不通開生之路致壅進違古典退乖今律臣少踐天官
老荷樞要每見訴訟出入嗟苦輒率愚見以爲宜停書
奏宣武納之其年除車騎大將軍涼州大中正懷又表

曰昔世祖升遐南安在位出拜東廟爲賊臣宗愛所賊時高宗避難龍潛苑中宗愛異圖神位未立先臣賀與長孫渴侯陸麗等奉迎高宗纂徽寶命麗以扶負聖躬親所見識蒙授撫軍司徒公平原王興安二年追論定策之勲進先臣爵西平王皇興季年顯祖將傳大位於京兆王先臣時都督諸將屯於武川被徵詣京特見顧問先臣固執不可顯祖久乃許之遂命先臣持節授皇帝璽綬於高祖至太和十六年麗息叡狀祕書稱其亡父與先臣援立高宗朝廷追錄封叡鉅鹿郡開國公臣時丁艱草土不容及例至二十年除臣雍州刺史臨發

奉辭面奏先帝申先臣舊勲時蒙敕旨但赴所臨尋當別判至二十一年車駕幸雍臣復陳聞時蒙敕旨征還當授自宮車晏駕遂爾不申竊惟先臣遠則援立高宗寶歷不墜近則陳力顯祖神器有歸如斯之勲超世之事也麗以父功而獲山河之賞臣有家勲不霑茆土之錫得否相懸請垂裁處詔曰宿老元臣云如所訴訪之史官頗亦言此可依授北馮翊郡開國公食邑九百戶又詔爲使持節加侍中行臺巡行北邊六鎮恒燕朔三州賑給貧乏兼採風謠考論殿最事之得失先決後聞自京師遷洛邊朔遙遠加以連年旱儉百姓困弊懷銜

命撫導存恤有方便宜運轉有無通濟時后父子勁勢
傾朝野勁兄子祚與懷宿昔通婚時爲沃野鎮將頗有
受納將入鎮祚郊迎道左懷不與相聞卽劾祚免官懷
朔鎮將元尼須與懷少舊亦貪穢狼籍置酒請懷曰命
之長短由卿之口豈可不相寬貸懷曰今日之集乃是
源懷與故人飲酒之坐非鞫獄之所也明日公庭始爲
使人檢鎮將罪狀之處尼須揮淚而已無以對之旣而
懷表劾尼須其奉公不撓皆此類也時百姓爲豪強陵
壓積年枉滯一朝見申者日有百數所上事宜便於北
邊者凡三十餘條皆見嘉納正始元年九月有告蠕蠕

率十二萬騎六道並進欲直趣沃野懷朔南寇恒代詔懷以本官加使持節侍中出據北蕃指授規略隨須徵發諸所處分皆以便宜從事又詔懷子直寢徵隨懷北行詔賜馬一匹細鎧一具御稍一枚懷拜受既訖乃於其庭跨鞍執稍躍馬大呼顧謂賓客曰氣力雖衰尚得如此蠕蠕雖畏壯輕老我亦未便可欺今奉廟勝之規總驍捍之衆足以禽其酋帥獻俘闕下耳時年六十一懷至雲中蠕蠕亡遁旋至恒代乃案視諸鎮左右要害之地可以築城置戍之處皆量其高下揣其厚薄及儲糧積仗之宜犬牙相救之勢凡表五十八條宣武並從

之卒贈司徒公諡曰惠懷性寬簡不好煩碎恒語人曰
爲政貴當舉綱何必須大子細也如爲屋但外望高顯
楹棟平正足矣斧斤不平非屋病也性不飲酒而喜以
飲人好接賓客雅善音律雖在白首至晏居之暇常自
操絲竹子子邕字靈和少好文雅篤志於學推誠待士
士多歸之累遷夏州刺史時沃野鎮人破六韓拔陵首
爲反亂統萬逆徒寇害應接子邕嬰城自守城中糧盡
煮馬皮而食之子邕善綏撫無有離貳以饑饉轉切欲
自出求糧留子延伯據守寮屬僉云未若棄城俱去更
展規略子邕泣請於衆曰吾世荷國恩此是吾死地更

欲何求遂自率羸弱向東夏運糧延伯與將士送出城
哭而拜辭三軍莫不嗚咽子邕爲朔方胡帥曹阿各拔
所邀力屈被執乃密遣人齎書間行與城中云大軍在
近汝其奉忠勿移其操子邕雖被囚束雅爲胡人所敬
常以百姓禮事之子邕爲陳安危禍福之端勸阿各拔
令降將從之未果而死拔弟桑生代總部衆竟隨子邕
降時北海王顥爲大行臺子邕具陳諸賊可滅狀顥給
子邕兵令其先出時東夏合境反叛所在屯結子邕轉
戰而前九旬之中凡數十戰乃平東夏徵稅租粟運糧
統萬於是二夏漸寧及蕭寶寅等爲賊所敗關右騷擾

時子邕新平黑城遂率士馬并夏州募義人鼓行南出
賊帥康維摩守鋸谷斷紹魏棠橋子邕與戰大破之禽
維摩又攻破賊帥契官斤於楊氏堡出自西夏至於東
夏轉戰千里至是朝廷始得委問除兼行臺尚書復破
賊帥紇單步胡提於曲沃明帝璽書勞勉之子邕在白
水郡破賊率宿勤明達子阿非軍多所斬獲除給事黃
門侍郎封樂平縣公以葛榮久逼信都詔子邕爲北討
都督時相州刺史安樂王鑒據鄴反敕子邕與都督李
神軌先討平之改封陽平縣公遂與裴衍發鄴討葛榮
而信都城陷除子邕冀州刺史與裴衍俱進子邕戰敗

而歿贈司空諡曰莊穆子邕弟子恭字靈順聰敏好學
稍遷尚書北主客郎攝南主客事時梁亡人許周自云
梁給事黃門侍郎朝士咸共信待子恭奏以爲真僞難
辯請下徐揚二州密訪周果以罪歸闕詐假職位如子
恭所疑河州羌却鐵忽反詔子恭爲行臺討之子恭示
以威恩兩旬間悉降朝廷嘉之正光元年爲行臺左丞
巡北邊轉爲起部郎中明堂辟雍並未建就子恭上書
求加經綜書奏從之稍遷豫州刺史頻以軍功加鎮南
將軍兼尚書行臺元顥之入洛也加子恭車騎將軍子
恭不敢拒之而頻遣間使參莊帝動靜未幾顥敗車駕

還洛錄前後征討功封臨潁縣侯侍中叅朱榮之死也
世隆度律斷據河橋詔子恭爲都督以討之尋而太府
卿李苗夜燒河橋世隆退走以子恭兼尚書僕射爲大
行臺大都督節閔帝初以預定策勲封臨汝縣子永熙
中入爲吏部尚書以子恭前在豫州戰功追賞襄城縣
男又論子恭餘効封新城縣子子恭尋表請轉授第五
子文盛許之天平初除中書監三年拜魏尹又爲齊神
武王軍司卒贈司空公諡曰文獻子彪

彪字文宗學涉機警少有名譽魏永安中以功賜爵臨
潁縣伯天平四年爲涼州大中正及齊文襄攝選沙汰

臺郎以文宗爲尚書祠部郎中皇建二年累遷涇州刺史文宗以恩信待物甚得邊境之和爲隣人所欽服前政被抄掠者多被放遣累遷秦州刺史乘傳之府特給後部鼓吹時李貞聘陳陳主云齊朝還遣源涇州來在瓜步真可謂通和矣武平三年授祕書監陳將吳明徹寇淮南歷陽瓜步相尋失守趙彥深於起居省密訪文宗討捍之計文宗曰國家待遇淮南失之同於蒿箭以爲宜以淮南委之王琳琳於曇瑱不肯北面事之明矣彥深曰第此良圖但以口舌爭來十日已是不見從時事如此安可盡言因相顧流涕及齊平與陽休之等十

八人入京授儀同大將軍司成下大夫隋開皇中拜莒州刺史遇病去官卒文宗以貴族子弟升朝列才識敏贍以幹局見知然好游貴要之門時論以爲善附會子師字踐言少知名明辯有識悟尤以吏事自許仕齊爲尚書左外兵郎中又攝祠部後屬孟夏以龍見請雩時高阿那肱爲錄尚書事謂爲真龍出見大驚喜問龍所在云作何顏色師整容云此是龍星初見依禮當雩祭郊壇非謂真龍別有所降阿那肱忿然作色曰漢兒多事強知星宿祭事不行師出竊歎曰國家大事在祀與戎禮旣廢也其能久乎齊亡無日矣尋周武帝平齊授

司賦上士隋文帝受禪累遷尚書左丞以明幹著稱時蜀王秀頗違法度乃以師爲益州總管司馬俄而秀被徵秀恐京師有變將謝病師數勸之不可違命秀乃作色曰此我家事何預卿也師垂涕苦諫秀乃從徵秀發後州官屬多相連坐師以此獲免後加儀同三司煬帝卽位拜大理少卿帝在顯仁宮敕宮外衛士不得輒離所守有一主帥私令衛士出外帝付大理師據法奏徒帝令斬之師奏曰若陛下初便殺之自可不關文墨旣付有司義歸恒典脫宿衛近侍者更有此犯將何以加之帝乃止師居職強明有口辯而無廉平之稱卒於刑

部侍郎子恭弟纂字靈秀位太府少卿遇害河陰贈定州刺史子雄

雄字世略少寬厚美姿容初仕魏歷位祕書郎在周以伐齊功封朔方公歷冀平二州刺史檢校徐州總管及尉遲迥作亂時雄家累在相州迥潛以書誘之雄卒不顧隋文帝遺書慰勉之迥遣其將畢義緒據蘭陵席毗陷昌慮下邑雄遣衆悉平之陳人見中原多故遣其將陳紀蕭摩訶任蠻奴周羅睺樊毅等侵江北自江陵東距壽陽人多應之攻陷城鎮雄與吳州總管于顛等擊走之悉復故地進位上大將軍拜徐州總管遷朔州總

北史卷之二十六 列傳
管平陳之役從秦王俊出信州道陳平以功進位上柱
國賜子崇爵端氏縣伯襄爲安化縣伯復鎮朔方後歲
上表乞骸骨徵還京師卒于家子嵩嗣大業中爲尚書
虞部郎討北海賊力戰死之贈正議大夫

劉尼代人也曾祖敦有功於道武爲方面大人父婁爲
冠軍將軍尼勇果善射太武見而善之拜羽林中郎賜
爵昌國子宗愛旣殺南安王余於東廟祕之唯尼知狀
尼勸愛立文成愛自以負罪於景穆聞而驚曰君大癡
人皇孫若立豈忘正平時事乎尼曰若爾立誰愛曰待
還宮擢諸王子賢者而立之尼懼其有變密以狀告殿

中尚書源賀時與尼俱典兵宿衛仍共南部尚書陸麗
謀密奉皇孫於是賀與尚書長孫渴侯嚴兵守衛尼與
麗迎文成於苑中麗抱文成於馬上入於京城尼馳還
東廟大呼曰宗愛殺南安王大逆不道皇孫已登大位
有詔宿衛之士皆可還宮衆咸唱萬歲賀及渴侯登執
宗愛賈周等勒兵而入奉文成於宮門外入登永安殿
以尼爲內行長封東安公尋遷尚書右僕射爲定州刺
史在州清慎然率多酒醉文成未爲司徒獻文卽位以
尼有大功於先朝特加尊重賜別戶四十皇興四年車
駕北征帝親誓衆而尼昏醉兵陳不整帝以其功重特

怨之免官而已延興四年薨子社生襲

薛提太原人皇始中補太學生拜侍御史累遷晉王不
衛兵將軍冀州刺史封太原公有政績徵拜侍中攝都
曹事太武崩祕不發喪尚書左僕射蘭延侍中和延等
議以皇孫幼沖宜立長君徵秦王翰置之祕室提曰皇
孫有世嫡之重人望所係春秋雖少令問聞於天下廢
所宜立而更別求必有不可延等未決中常侍宗愛知
其謀矯皇后令徵提等入殺之文成卽位以提有謀立
之誠詔提弟浮子襲先爵太原公有司奏降爲侯

論曰陸侯以智識見稱馘乃不替風範雅杖名節自立

功名其傳芳銘典豈徒然也麗忠國奉主鬱爲梁棟資
忠履義赴難如歸世載克昌名不虛得叡琇以沉雅顯
達何末亦披猖子彰令終之美家聲孔振印及彥師俱
以孝爲本出處之譽並可作範人倫爽學業有聞亦人
譽也源賀堂堂非徒武節觀其翼佐文成廷抑禪讓殆
乎社稷之臣懷幹略兼舉出內馳譽繼迹賢孝不墮先
業子邕功立夏方身亡冀野彪著名齊朝師雄官成隋
代美矣劉尼忠國豈徒驍猛之用薛提正議忠謀見害
姦閹痛乎

北史卷二十八

北史卷二十八考證

陸侯傳平涼休屠金崖羌狄子玉等叛○子監本誤于
今改從魏書

又與高涼王那復渡河南畧地○魏書無復字疑衍
後襲父改封建安王○父字下似脫爵字

抱病忍死者顧門計耳○一本門字下有戶字應從之
弟麗○麗侯之子馥之弟今敘於馥五世從孫融之後
而云弟麗誤亦甚矣此蓋因引魏書後復歷引齊周
隋書而至此復引魏書不及檢耳

印傳印字雲駒○印魏書作昂

徽傳高貴弟孟遠位奉朝請○魏書高貴弟順宗員外郎秘書中散與此小異

源賀傳擊五城吐京胡○吐監本訛以今改從魏書賊帥康維摩守鋸谷斷紹甄棠橋○魏書無紹字疑衍河州羌却鐵忽反○忽監本訛忠今改從南本

彪傳子師字踐言○閣本脫子字今從齊書增正

北史卷二十八考證